

之舉帆疾也

張飛有馬號玉追時歌曰人中有張飛馬中有

王追

寰宇記

豹月烏張飛馬

彙苑

魏曹彰性倜儻偶逢駿馬愛之其主所惜也彰

曰余有美妾可換唯君所選馬主因指一妓彰

遂換之馬號曰白鶻

獨異志

廣漢楊翁仲聽鳥獸之音乘蹇馬之野田間有  
放眇馬相去鳴聲相聞翁仲謂其御曰彼放馬

知此馬而目眇其御曰何以知之曰罵此轅中

馬蹇此馬亦罵之眇其御不信往視之目竟眇

馬

論衡

魏時鮮卑獻千里馬白色兩耳黃名曰黃耳

穆天

子傳

程堅南陽人居貧以磨鏡給養母喪哀號櫪下

有馬每聞堅哭輒淚出暫輟芻草

魏畧

魏齊王嘉平初白馬河出妖馬夜過官牧邊鳴

呼衆馬皆應明日見其跡大如斛行數里還入

河 搜神記

黃平夢舍中馬舞數十人向馬拍手索統曰馬火也馬舞火起也向馬拍手救火也平未歸火發大興二年丹陽郡吏濮陽演馬生駒兩頭自項前別生而死此政在私門二頭之象也其後王敦陵上上

李南乘赤馬行道逢他人乘白馬者白馬先鳴而南赤馬應之南謂從者曰彼馬言汝當見一黃馬左目盲者是吾子可爲使駛行相及從者不信行二里所果逢黃馬而左目盲南馬先鳴而黃馬應之問其主果向白馬子也抱朴子

符堅爲慕容冲所襲堅騎馬墮而落澗追兵幾及計無由出馬卽踟躕臨澗而垂鞍與堅堅不能及馬又跪而受焉堅援之得登岸而西至廬

江異苑

吾與玄子觀東海釋駟而升乎岷山未中路而忘馬符子使人求之不獲使鬼索之而獲符子曰六合不可忘故知良馬在其中矣請以六合

之觀觀之也

符子

王武子好馬非馬不行正旦則柳葉金障泥上元則滿月韉清明則剪水鞭重午則籠嬌鞍中秋則玉櫳總絡頭重陽則蟬兒鐙春秋社則塗金鞍冬至則嘶風鐙除日則藥王鞍每節則飼馬以明紗豆薔薇草

馬癖記

老宿諺言赫連之世有駿馬名曰白口騮

水經注

上以王融才辯十一年使兼主客接虜使房景高宋弁上以虜獻馬不稱使融問曰秦西冀北

實多駿驥而魏主所獻良馬乃駑駘之不若求名檢事殊爲未孚將旦旦信誓有時而爽駟駟之牧不能復嗣宋弁曰不容虛偽之名當是不習土地融曰周穆馬跡徧於天下若騏驥之性因地而遷則造父之策有時而躓弁曰王主客何爲慙慙於千里融曰鄉國旣異其優劣聊復相訪若千里日至聖上當駕鼓車弁曰向意旣須必不能駕鼓車也融曰買死馬之骨亦卽隗之故弁不能答

南齊書

曇邃少出家止河陰白馬寺蔬食布衣誦法華經又釋達經旨亦爲人解說常於夜中忽聞扣戶云欲請法師九旬說法邃不許固請乃赴之而猶是眠中比覺已身在白馬塢神祠中拜一弟子自是日日密往餘無知者後寺僧經祠前見有兩高座邃在北弟子在南如有講說聲又聞有奇香之氣於是道俗共傳神異至夏竟神施白馬一疋白羊五頭絹九十匹咒願畢於是而絕

神僧傳

梁武帝有良馬名照殿玉獅子

小說

陸法和嘗謂人曰勿繫馬於碓其人行過鄉曲門側有碓因繫馬於其柱入門中憶法和戒走出將解之馬已斃矣

北齊書

河間王琛遣使至波斯國求得千里馬號追風

赤以銀爲槽金爲鎖環

洛陽伽藍記

北齊散騎常侍河南陸又黃門郎印之子也印字雲駒而又患風多所遺忘嘗與人馬曰雲駒有神符者常帶符與人渡漳水至失符又笑曰

劉君渡水失神符其人答曰陸又各馬作雲駒

談數

王皓字季高少立名行性懦緩嘗從文宣北伐乘赤馬赤蒙霜氣遂不復識自言失馬虞侯爲求不得須臾日出馬體霜盡繫在幙前方云我

馬尚在

北史

韋夔至延州見弟孝寬以所乘馬及轡勒與之夔惡其華飾心弗欲之笑謂其弟曰昔人不棄遺簪墜履者惡與之同出不與之同歸也卒乘

舊馬而歸

煬帝使李星御馬一匹名獅子駮

海錄碎事○以下驟驢

修彌國多神馬驟驢十丈毛色皎然能行水上

有兩翼或飛於海上常與牧馬合則生神驢

洞冥記

趙簡子有兩白驢而甚愛之陽城胥渠處廣門之官夜欵門而謁曰主君之臣胥渠有疾醫教之曰得白驢之肝病則止不得則死於是召庖人殺白驢取肝以與陽城胥渠處無幾何趙興

兵而攻翟廣門之官左七百人右七百人皆先  
登而獲甲首 呂氏春秋

漢靈帝養驢數百頭常自騎之驅馳遍京師有  
時駕四驢入市 金樓子○又宋廢帝亦于殿上養驢

王粲好驢家畜數頭其價有至百金者其一曰  
落釵其二曰遠遊其三曰鷲翼其四曰白鳳其  
五曰臨江其六曰上雲其七曰奔濤其八曰飛  
星 下帷短牒

石虎鄴中有一胡道人知咒術乘驢作估客于  
外國深山中行下有絕澗窅然無底忽有惡鬼  
偷牽此道人驢下入絕澗道人尋跡咒誓呼諸  
鬼王須臾即驢物如故 搜神記

釋道安常乘赤驢往來荆襄間一日而徧  
王奐初拜僕射劉祥與奐子融載行至中堂見  
路人驅驢祥曰驢汝好爲之如汝人才皆已令  
僕矣 南齊書

元恒傲狼兇鹿安豐王延明每切責之曰昔宋  
有東海王禕志性凡劣人號曰驢王我熟觀汝

所作亦恐不免驢當時聞者號爲驢王後魏書

沙苑之敗李神雋策眇馬而走曰丁掾力馬倒

曰丁掾誤我北史

若乃三軍陸邁糧運艱難謀臣停筭武夫吟歎

爾乃長鳴上黨慷慨應邦崎嶇千里荷囊致餐

用捷大勲歷世不刊斯寔爾之功者也音隨時

興晨夜不默仰契玄象俯協漏刻應更長鳴毫

分不忒雖挈壺著稱未足比德斯又爾之智也

若乃六合昏晦三辰幽瞑猶憶天時用不廢聲

斯又爾之明也青脊隆身長頭廣額修尾後垂

巨耳雙磔斯又爾之相也嘉麥旣熟實湏精麩

負磨迴衡迅若轉電惠我衆庶神祇獲薦斯又

爾之能也爾有濟師旅之勲而加之以衆能是

用遣中大夫閻丘騾加爾使銜勒大鳴鴻臚班

脚大將軍官亭侯以揚州之廬江江州之廬陵

吳國之桐廬合浦之珠廬封爾爲廬山公宋索叔排

諧集驢山公九錫文

附大蘭王九錫文曰太亥十年九月乙亥

廣博物志

卷之四下

卷之三十一

朔十三日丁亥北燕伯使使者豪豨冊命  
大蘭王曰唯君稟太陰之沉精標羣形於  
玄質體肥腠而洪茂長無心以遊逸資豢  
養於人主雖無爵而有秩此君之純也君  
昔封國殷商號曰豕氏葉隆當時名垂後  
世此君之美也白滴彰於周詩港波應乎  
隆象歌詠垂於人口經千載而流響此君  
之德也君相與野遊爲君雄顧羣數百自  
西徂東俯歎洙則成霧仰奮鬣則生風猛  
毒必噬有敵必攻長驅直突陣無全鋒此  
君之勇也

過去世時有城名波羅柰國名伽尸有一婆羅  
門有摩沙豆陳久煮不可熟持着肆上欲賣與  
他都無人買時有一人家有一態驢市賣難售  
時陳豆主便作是念我當以豆買此驢用便在  
語言汝能持驢買此豆那驢主復念用是態驢  
爲當取彼豆卽便答言可爾得驢已歡喜爾時  
豆主便作是念今得驢子便卽說頌曰婆羅門



法巧販賣陳久沙豆十六年唐盡汝薪煮不熟  
感折小齒 爾時驢主亦作頌曰汝婆羅

門何所喜雖有四脚毛衣好負重着道令汝知  
錐刺火燒終不動爾時豆復說偈言獨生千秋  
杖頭着四寸針能治敗態驢何憂不可伏爾時  
驢聞復瞋卽說誦曰安立前二足雙飛後兩蹄  
折汝前板齒然後自當知爾時豆主聞驢此頌  
復說偈言蚊蚩毒虫螫唯仰尾自防當截汝尾  
却今汝知辛苦爾時驢復以偈答言從先祖已

來行此憊快法今我故承習死死終不捨爾時  
豆主知此弊惡不可苦語便更稱譽以頌答曰  
音聲鳴徹好面白如珂雪當爲汝取婦共遊林  
澤中驢聞輒愛語復說頌曰我能負八斛日行  
六百里婆羅當知聞取嬾歡喜故

僧祇律

爾時殊致羅婆菩薩告諸龍言過去去世時此賢  
劫初有一天子名曰大三摩多端正少雙才智  
聰明以正行化常樂寂靜不樂愛染常樂潔身  
王有夫人多貪色慾王旣不幸無處遂心曾於

一時見驢命羣根相出見慾心發動脫衣就之  
驢見卽交遂成胎藏月滿生子頭耳口眼悉皆  
似驢唯身類人而復麤澀駁毛被體與畜無殊  
夫人見之心驚怖畏卽便委棄投於廁中以福  
力故處空墜時有羅利婦名曰驢神見兒不污  
念言福子遂于空中接取洗持將往雪山乳哺  
畜養猶如已子等無有異及至長成教服仙藥  
與天童子日夜共遊復有大天亦來愛獲此兒  
飲食甘果藥草身體轉異福德莊嚴大光照曜

如是天衆共同稱美號爲法驢虱此大仙聖人  
以是因緣彼雪中并及餘處悉皆化生種種好  
華好果好藥好香種種清流種種好鳥在所盈  
住普皆豐盈以此藥果資益因緣其餘形容麤  
相悉轉身體端正唯脣似驢是故名爲驢脣仙  
人

大集經

廣博物志卷之四十六 終

廣博物志卷之四十七

隴西董斯張纂

當湖劉廷元訂

獸下

王冰作服牛

呂氏春秋

稷之孫曰叔均是始作牛耕

註始用牛犁也○山海經

牛人掌養國之公牛

公牛謂公家之牛

以待國之政令

以待祭祀賓客享食賓射軍事喪事之所需也

凡祭祀共其享牛求牛

以授職人而芻之

享牛享祭之牛求牛隔日釋祭求神所用之牛命牧人芻



之養凡賓客之事供其牢禮積膳之牛饗賓射供其膳羞之牛軍事供其犒牛喪事供其奠牛凡會同軍旅行役供其兵車之牛與其牽傍以載公任器周禮

隋志有甯戚相牛經

牛岐胡有壽岐胡牽兩腋亦分爲三也眼去角近行駛眼欲

得大眼中有白脉貫瞳子最快二軌齊者快二軌

從鼻至髀爲前軌甲至髀爲後軌頸骨長且大快壁堂欲得闊

壁堂脚倚欲得如絆馬聚而正也莖欲得小膺

庭欲得廣膺庭胸也天關欲得成天關脊接骨也僑骨欲得

垂僑骨脊骨中夾欲得下也洞胡無壽洞胡從頭至臆也旋毛在珠

淵無壽珠淵在眼下也上池有亂毛起妨主上池兩角中一日戴

麻也倚脚不正有勞病角冷有病毛拳有病毛欲

得短密若長疎不耐寒氣耳多長毛不耐寒熱

单脊無力有生廊卽决者有大勞病尿射前脚

者快直下者不快亂睫者舐人後脚曲及直竝

是好相直尤勝進不甚直退不甚曲爲下行欲

得似羊行頭不用多肉臀欲方尾不用至地至

地少力尾上毛少骨多者有力膝上縛肉欲得

硬角欲得細橫豎無在大身欲得促形欲得如

卷卷者其形側也插頸欲得高一曰體欲得緊大膝疎

肋難飼龍突目好跳又云不能行也鼻如鏡鼻難牽口

方易飼蘭株欲得大蘭株尾豪筋欲得成就豪筋脚後

筋橫豐岳欲得大豐岳膝蹄欲得豎豎如羊角垂星欲

得有努肉番星蹄上有肉力桂欲得大而成功力

常車肋欲得密肋骨欲得大而張張而廣也髀骨欲得

出雋骨上出背脊骨上也易牽則易使難牽則難使泉

根不用多肉及多毛泉根莖所出也懸蹄欲得橫如八字也

陰虹屬頸行千里陰虹者有雙筋白毛陽鹽欲

得廣陽鹽者夾尾當陽鹽中間脊骨欲得窳窳則

雙脊不窳則為單脊常有似鳴者有黃齊民要術

相牛經云陰虹屬頸千里註曰陰虹者雙筋白

尾骨屬頸窳戚所飯者也愷之牛其亦有陰虹

也

史記云寧為鷄口無為牛後按延策國策音義

云尸鷄中之主從牛子然則口當為尸後當為

黃博物志 卷之四十七 三 高軍堂

從俗寫誤也

顏氏家訓

州畱者其實水牛蒼毛豕身角若擔矛衛護其犢與虎爲讐

異物志

太月氏有牛名曰日及割取肉一二筋明日瘡愈漢人入國示之以爲珍異漢人曰吾國有蟲名曰蠶食桑葉爲人吐絲外國復不信有之

記

武都故道縣有怒特祠云神本南山大梓也昔秦文公伐之樹瘡隨合乃遣人持斧斫之猶不

斷一人傷足不能去卧樹下聞鬼相與言曰勞攻戰乎其一曰足爲勞矣又曰秦公必不休答曰其如我何又曰赤灰跋於子何如乃默無言卧者以告令士皆赤衣隨所斫以灰跋樹斷化爲牛入水故秦爲立祠

列異傳○又搜神記武王雍州神樹同此不重

錄

詹何坐弟子侍有牛鳴於門外弟子曰是黑牛也而白題詹何曰然黑牛也而白在其角使人視之果黑牛而以布裹其角以詹子之術嬰

衆人之心華焉殆矣故曰道之華也嘗試釋詹子之察而使五尺之愚童子視之亦知其黑牛而以布裹其角也故以詹子之察苦心傷神而後與五尺之愚童子同功

韓子

夷逸者夷詭諸之裔或勸其仕曰吾譬則牛也寧服軛以耕於野不忍被繡入廟而爲犧尸子秦昭王有病百姓里買牛而家爲王禱公孫述出見之入賀王曰百姓乃家里買牛爲王禱王使人問之果有之王曰訾之人二甲訾毀也夫

非令而擅禱是愛寡人也夫愛寡人寡人亦且改法而心與之相循者是法不立法不立亂亡之道也不如人罰二甲而復與爲治

韓非子

公明儀爲牛彈清角之擦伏食如故非牛不聞不合其耳矣轉爲蚩蚩之聲孤犢之鳴卽掉尾奮耳蹠躩而聽

太原縣北有銀牛山漢建武二十四年有一人騎白牛蹊人田父誚詰之乃曰吾北海使將看天子登封遂乘牛上山田父尋至山上惟見牛

跡遺糞皆銀也明年世祖封禪焉

西陽雜俎

大秦國貢花蹄牛其色駁高六尺尾環遶其身角端有肉蹄如蓮花善走多力帝使輦銅石以起望僊宮跡在石上皆如花形故陽關之外花牛津時得異石長十丈高三丈立於望僊宮因名龍鍾石武帝末此石自陷入地惟尾出土上今人謂龍尾墩也

述異記

郭林宗謂仇季知曰子嘗有過否季知曰吾嘗飯牛牛不食一搏牛耳

卜子

管輅洞曉術數初有婦人亡牛從卜曰可視東丘塚中當懸向上旣而果得婦人反疑輅告官按驗乃知是術數所推

別傳

桓玄在南常出詣殷荊州於鶴穴逢一老翁羣驅青牛形色瓌異玄卽以所乘牛易取乘之至靈溪駿駛非常玄息駕飲牛牛入水不出桓使覘守經日絕跡當時以爲神物

渚宮故事

惠帝太安中江夏張騁所乘牛言曰天下亂乘我何之騁懼而還犬又言曰歸何早也尋後牛



又人立而行騁使善卜者卜之謂曰天下將有兵亂爲禍非止一家

晉書

元嘉中益州刺史吉翰遷爲南徐州先於蜀中載一青牛下常自乘恒於目前養視翰遘疾多日牛亦不肯食及亡牛流涕滂沱吉氏喪未還都先遣驅牛向宅牛不肯行人知其異卽待喪喪旣下船便隨去

幽州錄

宋譙國城父人王曇首常以牛作脯爲業欲殺一牛見刀輒跳躍欲走曇怒乃先以刀刺牛目經少時其人眼無故暴出而死

陳後主時秣陵有泉深不可測產魚鱉甚衆恒有聲如牛邑人懼之不敢犯無何忽見牛頭于岸下里民牽而出之於是捕其魚乃盡江東舊以牛頭山爲天關今牛頭已獲蓋示國將滅而

關毀也後年隋平陳

廣古今五行記

竺法慧語弟子云新野有一老公當命過吾欲度之仍行於畦畔之間果見一公將牛耕田慧從乞牛公不與慧前自捉牛鼻公懼其異遂以

施之慧牽牛祝願七步而反以牛還公公爲少  
日而亡

法苑珠林

卞士瑜者其父以平陳功授儀同愷各常僱築  
宅不還其價作人求錢卞父鞭之曰若實負錢  
我死當與爾作牛須臾之間卞父死作人有牛  
產一黃犢腰下有黑文橫結周匝如人腰帶右  
膊有白文斜貫大小正如笏形牛主呼之曰卞  
公何爲負我牛卽屈前膝以角著地瑜以錢十  
萬贖之牛主不許死乃收葬

廣五行記

魏土地記曰沮陽城東八十里牧牛山下有  
九十九泉卽滄河之上源也山在縣東北三十  
里山上有道武皇帝廟耆舊云山下亦有百泉  
競發有一神牛駿身自山而降下導九十九泉  
飲泉竭故山得其名今山下導九十九泉積以  
成川西南流

水經

佛迹寺有牛產犢出首還隱已過信次母將亡  
僧告智曠知惻答曰此犢是寺居士侵用僧物  
今來償債其羞不出牛母無他因執爐呵戒犢

子疾當償報何耻生乎應言便出

神僧傳

隋并州竹永通曾貨寺家粟六十石年久不還索之云還訖遂於佛堂誓言若實未還當與寺家作牛此人死後寺家生一黃犢足有白文乃是竹永通字鄉人觀者日數千其家用粟百石於寺贖牛別立一室事之如生仍爲造像寫經月餘遂死

北虜之先索國有泥師都二妻生四子一子化爲鴻遂委三子謂曰爾可從古旃古旃牛也三

子因隨牛牛所糞悉成肉酪

雜俎

秦文王五年游於胸衍有獻五足牛者時秦世喪用民力京房易傳曰興繇役奪民時厥妖牛生五足

搜神記

漢景帝中六年梁孝王田北山有獻牛足出背上者劉向以爲牛禍思心霧亂之咎也至漢靈帝延熹五年臨沅縣有牛生鷄兩頭四足

晉大興元年三月武昌太守王諒有牛生子兩頭八足兩尾共一腹不能自生十餘人以繩引

之子死母活其三年後苑中有牛生一足三尾生而死也

漢桓帝延禧年五臨沅縣有牛生鷄兩頭四足並

上

昔佛在世時時有國王號名捷陀奉事婆羅門婆羅門居在山中多種果樹時有擔樵人毀其果樹婆羅門見之便將詣王所言是人無狀殘敗我果樹王當治殺王敬事婆羅門不敢違卽爲殺之自後未久有牛食人稻其主逐播折其

一角血流滿面牛還到王所自言我實無狀食此人少稻今折我角主亦追到王所王曉鳥獸語王語牛言我當爲女殺之牛卽報言今雖殺此人亦不能令我不痛但當約勅王便感念言我事婆羅門但坐果樹令我殺人不如此牛今事此道復不免生死何用此道便到佛所五體投地爲佛作禮願受五戒十善佛言市施持戒現世得福忍辱精進一心智慧其德無量後生天上王歡喜得須陀恒阿難白佛言此王與牛

本何因緣佛言乃昔拘那舍牟尼佛時王與牛  
爲兄弟作優婆塞共持齋戒一日一夜王守法  
精進不敢懈怠壽終升天上壽盡下爲國王牛  
時犯齋夜食後受其罪罪畢復作牛五伯世尚  
有宿識故來開悟王意牛後七日壽終上生天

法苑  
珠林

昔佛在世時有賈客名弗迦沙因入羅越城分  
衛於城門中值新產特牛所舐殺牛主怖懼賣  
牛轉與他人其人牽牛欲飲水復舐殺其主其

主家人瞋恚取牛殺之於市賣肉有田舍人買  
取牛頭負擔持歸去舍里餘坐樹下息以牛頭  
掛樹枝須臾絕斷牛頭落下正墮人上牛角刺  
人卽時命終一日之中凡殺三人瓶沙王聞之  
恠其如此卽與羣臣往詣佛所具問其意佛告  
王曰往昔有賈客三人到他國內與生寄往獨  
孤老母舍應與僱舍直見老母孤獨欺不欲與  
伺老母不在默然而去母歸不見客卽問皆云

云老母瞋恚尋後逐及疲頓索直三客逆罵

我前已與云何復索不肯與直老母單弱不能奈何懊惱而咒願我後世所生之處若當相值要當殺汝佛語瓶沙王爾時老母今此特牛是也三賈客者佛迦沙等三人爲牛所舐殺者是也

昔罽賓國中有兄弟二人其兄出家得阿羅漢弟在家中治修居業時兄數來教誨勸弟布施持戒修善作福現有名譽死生善處而弟報曰兄今出家不慮官府不念妻子田園財寶我有

此務而兄數誨不用兄教後病命終生在牛中爲人所驅馱鹽入城兄從城中出偶見之卽爲說法牛聞已悲咽不樂牛主見已語道人曰汝何導說而使我牛憂愁不樂道人報曰此牛前身本是我弟昔日負君一錢鹽債故墮牛中以償君力牛主聞已語道人曰君弟昔日與我親友是時牛主卽語牛曰吾今放汝不復役使牛聞感激至心念佛自投深澗卽便命終得生天上

昔捷馱羅國迦膩色迦王有一黃門恒監內事暫出城外見有羣牛數盈五百來入城內問驅牛者此是何牛答言此牛將去其種於是黃門卽自思忖我宿惡業不受男身今應以財救此牛難遂償其價悉令得脫善業力故令此黃門卽復男身深生慶悅尋還城內佇立宮門附使啟王請入奉現王令喚入恠問所由於是黃門具奏上事王聞驚喜厚賜珍財轉授高官

昔六迦羅越

華言居士

出錢爲業有二人舉錢一萬

至日還之後日二人復相謂曰我更各舉十萬後不還之亦可有牛繫在籬裏語二人曰我先世坐負主人一千錢不還償今三次作牛猶還未了况君欲取十萬罪無畢時二人驚恠會天已曉主人出二人說牛之語主人卽便放著羣中不復取用咒願此牛自今以後莫復更受此畜生身若有餘錢一以布施牛後命過得生人中

佛在騎薩羅國將諸比丘欲請勒那樹下至一

澤中有五百水牛甚大凶惡復有五百放牛之人遙見佛來將諸比丘從此道中行高聲叫喚唯願世尊莫此道行此牛羣中有大凶惡牛極突傷人難可得過爾時佛告放牛人言汝等今者莫大憂怖彼水牛者設來舐我吾自知時語言之頃惡牛卒來翹尾低角跳躑直前爾時如來於五指端化五獅子<sub>在佛左右四面周匝有</sub>大火坑時彼惡牛甚大惶怖四向馳走無有去處唯佛足前有許多地宴然清涼馳奔趣向心意泰然復無怖畏長跪伏首舐世尊足爾時世尊知彼惡牛心已調伏即便爲牛而說偈言盛心興惡意欲來傷害我歸誠望得勝反來舐我足時彼水牛聞佛世尊說此偈已深生慚愧欬然悟解蓋障雲除知在先身在人道中所作惡業倍生慙愧不食水草即便命終生忉利天憍梵波提過去世曾作比丘於他粟田邊摘一莖粟觀其生熟數粒墮地五百世作牛償之

○以  
上並

下羊



羊以正月產者為上羔仲冬產者為次羔季春以後產者為下羔

羊屬吳羊壯一歲曰牡翔三歲曰羝其牝一歲

曰牝羝三歲曰牝吳羊羝曰羝殺羊羝曰羯羝

犖羝羝美也美皮冷角 廣雅

羊人掌羊牲凡祭祀飾羔 謂飾以績也 祭祀割

羊牲登其首 首者陽氣所聚 凡祈珥共其羊牲

賓客共其法羊凡沈辜侯禴釁積共其羊牲 禮周

獬羊之角重於肉斲木之舌長於喙 玄覽

吳房堂溪有白羊淵淵水舊出山羊漢武元封

二年有白羊出此淵舊牧者禱祀之初出一羊

婦人大驚拍手羊自此絕焉 郡國志

羊而不角呼蛟羊 述異記

古人說羊一名胡髯郎又名青鳥 述異記

月氏之羊其頭在野厥高六尺尾亦如馬何以

審之事見爾雅 郭璞羊贊

昔有攘羊者以羊遺叔嚮母埋之不食後三年

攘羊事發追捕嚮家檢羊骨肉都盡唯舌猶在

國人異之遂以羊舌爲族矣

搜神記

齊莊公之臣王國畢中里檄者訟三年而獄不  
斷恐失有罪使二人羊盟齊之社二子相從以  
羊血灑社讀王國畢之詞已盡絕里檄之詞未  
半祭羊起而觸中里檄齊人以為有神驗墨子  
修羊公者魏人也後以道干景帝帝禮之使止  
王邸中數歲道不可得有詔問修羊公能何日  
發語未訖牀上化爲白羊題其脇曰修羊公謝  
天子後置石羊於靈臺上羊後復去不知所在

列仙傳

漢齊人梁文好道其家有神祠建室三四間座  
上施阜帳常在其中積十數年後因祀事帳中  
忽有人語自呼嵩山君大能飲食治病有驗文  
奉事甚肅積數年得進其帳中神醉文乃乞得  
奉見顏色調文曰授手來文納手得持其頤髯  
鬚甚長文漸繞手卒然引之而聞作羊聲座中  
驚起助文引之乃袁公路家羊也失之七八年  
不知所在殺之乃絕

搜神記

隴州汧源縣有土羊神廟昔秦始皇開御道見  
二白羊鬪遣使逐之至此化爲土堆使者驚而  
回秦始皇乃幸其所見二人拜於路隅始皇問  
之答曰臣非人乃土羊之神也以君至此故來  
相謁言訖而滅始皇遂令立廟至今祭祀不絕

隴州  
圖經

符堅時有人於明光殿大呼曰甲申乙酉魚羊  
食人悲哉無復遣堅命執之俄而不見秘書監  
朱彤等因請誅鮮卑堅不從也

十六國  
春秋

石虎嘗晝寢夢見羣羊負魚從東北來寤以訪  
佛圖澄澄曰不祥也鮮卑其有中原乎慕容氏  
後果都之

高僧傳

梁時王克爲永嘉郡有人餉羊集賓欲讌而繩  
解來投一客先跪兩拜便入衣中此客竟不言  
之固無救請須臾宰牛爲炙先行至客一嚮入  
口便下皮內周行徧體痛楚號叫方復說之遂  
作羊鳴而死

冥報記

耆域時或告人以前身所更謂支法淵從羊中

來竺法與從人中來又譏諸衆僧謂衣服華麗不應素法

神僧傳

王固聘魏因宴享祭請停殺一羊羊於固前跪拜又宴昆明池魏人以南人嗜魚大設罟網固以佛法咒之遂一鱗不獲

南史

有人送書於高爽告躡云比日守羊困苦爽答曰守羊無食何不負羊糴米

上

昔有老公其家巨富而此老公思得肉食詭作方便指田頭樹語諸子言令我家業所以諧富

由此樹神恩福故耳今日汝等宜可羣中取羊以用祭祀時諸子等承奉教命尋卽殺羊禱賽此樹卽於樹下立天祀舍其父後時壽盡命終行業所追還生已家羣羊之中時值諸子猶祠樹神便取一羊遇得其父將欲殺之羊便嚙嚙笑而言曰見此樹者有何神靈我於往時爲思肉故妄使汝祀皆共汝等同食此肉今償殃罪獨先當之時有羅漢過到乞食見其亡父受於羊身卽借主人道眼令自觀察乃知是父心懷

懊惱卽壞樹神悔過修罪不復殺生

法苑珠林○以下犬

犬人掌犬牲凡祭祀共犬牲用牲物

用純伏瘞色物

亦如之

伏謂伏犬以王車轢之瘞謂埋祭也二者亦用牲物

○凡幾珥沈

辜用驪可也凡相犬牽犬者屬焉掌其政治

周禮

狗名重工徹止翟獫來白龍狗

穆天子傳

渠搜犬者露犬也能飛食虎豹

周書

犬則有青鸚白雀飛龍虎子

周處風土記

猊狻南越犬名也殷虞晉葵竝犬名也

犬生四子取黃子養之犬生五子取青子養之

六子取赤子養之七子取黑子養之八子取白

子養之白犬烏頭令人得財白犬黑尾令人世

世乘車黑犬白耳犬主畜之令人富貴黑犬白

前兩足宜子孫黃犬白尾令人世世衣冠

禮五行書

犬屬殷虞晉葵楚黃韓獹宋狻狼狐狂獫

廣雅

龜骸環裳子孫聰明狗肝泥竈婦取孝順

張華感物

類從志

申叔問曰犬馬之名皆因其形色而名焉唯韓

盧宋鵲獨否何也子順答曰盧黑色鵲黑白色

非色而何

孔叢子

金門之山有赤犬名曰天犬下則天下兵起

山海

經

昔三苗大亂龍生於廟犬哭於市

隋巢子

介鬪閭里有狗宋人之驚狗也其家命之為淖

逐狗不及止矣而望之自以為過矣

莊子

公孫子賢而徐子不肖而公孫子與徐子鬪徐

子之狗攫公孫子之腓而噬之

春秋後語

景公走狗死命外供之棺內給祭晏子諫公曰

亦細物也特以與左右為笑耳晏子曰孤老凍

餒而死狗有祭鰥寡不恤而死狗有棺行辟若

此百姓聞之必怨吾君諸侯聞之必輕吾國而

乃以為細物君其圖之公曰善趣庖治狗以會

朝屬

晏子春秋

范蠡吠於犬竇文種聞而拜之鮑龍跪石而吟

仲尼為之下車

劉子

齊有貧者命其狗為富命其子為樂方將祭狗

入於室叱之曰富出祝曰不祥家有禍長子死

哭曰樂乎而不自悲也 尸子

康衢長者字僮曰善搏字犬曰善噬賓客不過其門長者恠而問之以實對於是改之賓客復往 尹文子

楚王與羣臣獵於雲夢縱良犬逐狡兔三日而獲之其腸似鍊良工曰可以為劍 異苑

麗山西有白鹿原原上有狗堡秦襄公時有大狗來下有賊則狗吠之故一堡無患川得厥目 三秦記

鄭子陽之難獬狗潰之齊高國之難失牛潰之

呂氏春秋

客謂孟嘗君曰臣聞周氏之譽韓氏之盧天下之疾狗也見兔而指屬則無失兔矣望見而放狗也則累世不能得兔矣狗非不能屬之者罪也 說苑

周威烈王二十七年乙亥五月晉有三大犬率眾犬數萬聚於絳殺一犬於東方一犬於西方文帝後元五年六月齊雍城門外有狗生角京

房易傳曰執政失下將害之厥妖狗生角搜神記漢景帝三年邯鄲有狗與彘交是時趙王悖亂遂與六國反外結匈奴以為援五行志以為犬兵革失眾之占豕北方匈奴之象逆言失聽交於異類以生害也京房易傳曰夫婦不嚴厥妖狗與豕交茲謂反德國有兵革上

茂陵少年李亨好馳駿狗逐狡獸或以鷹鷂逐雉兔狗則有修毫瞪睫白望青曹之名鷹則有青翅黃眸青冥金距之屬楊萬年有猛犬青駿

西京雜記

右扶風臧仲英為侍御史家人作食設案有不清塵土投汙之炊臨熟不知釜處兵弩自行火從篋簾中起衣物盡燒而篋簾故完婦女婢使一旦盡失其鏡數日從堂下擲庭中有人聲音還汝鏡女孫年三四歲亡之求不知處兩三日乃於園中糞下啼若此非一汝南許季山者索善卜卦卜之曰家當有老青狗物內中侍御者名益喜與共為之誠欲絕殺此狗遣益喜歸鄉

西京雜記 卷之四 三十三



里仲英從之恠遂絕後徒爲太尉長史遷魯相  
搜神記

桂陽太守李叔堅爲從事家有狗人行家人言  
當殺之叔堅曰犬馬喻君子狗見人行效之何  
傷頃之狗戴叔堅冠走家大驚叔堅曰悞觸冠  
纓挂之耳狗又於竈前畜火家益恠營叔堅復  
云兒婢皆在田中狗助畜火幸可不煩鄰里此  
有何惡數日狗自暴死家卒無織芥之異風俗通  
鮑永事後母至孝妻嘗於母前叱狗永卽去去妻

靈帝熹和四年於西園弄狗著進賢冠帶綬以  
爲笑樂有一狗突出走入司徒府門或見之者  
莫不驚恠

漢末富春有桑君者養犬數年不吠孫文臺微  
時經此犬忽吠之桑謂文臺曰君其異相乎及  
貴欲報桑無所好唯好張罟捕魚文臺爲作九  
里單以贈之文臺堅字也郡國志

孫權時李信純襄陽紀南人也家養一狗字黑  
龍愛之尤甚行坐相隨飲饌之間皆分與食忽

一日於城外飲酒大醉歸家不及卧於草中遇太守鄭瑒出獵見田草深遣人縱火焚之信純卧處恰當順風犬見火來乃以口拽純衣純亦不動卧處有一溪相去三五十步犬即奔往入水濕身走來卧處周迴以身灑之獲免主人大難犬運水困乏致斃于側俄爾信純醒來見犬已死遍身濕毛甚訝其事覩火踪跡因而慟哭聞於太守太守憫之曰犬之報恩甚於人人不知恩豈如犬乎即命具棺槨衣衾葬之今紀南

有義犬墓高十餘丈

搜神記

晉武帝大康七年郊壇下有一白狗高三尺光色鮮明恒卧壇側覺見人前則去騎督王琬以駿馬追之狗徐行馬不可及射又逃琬去復還郊丘非狗所守後遂大亂又武帝時幽州有狗鼻行地三百餘步帝不思和嶠之言而立惠帝以致衰亂

郭頌世語

晉元康中吳郡婁縣懷瑤家忽聞地中有犬子聲隱其聲上有小穿大如蟬瑤以杖刺之入數

尺覺如物乃掘視之得犬子雌雄各一目猶未  
開形大於常犬也哺之而食左右咸往觀焉長  
老或云此名犀犬得之者令家富昌宜當養之  
以目未開還置穿中覆以磨礮宿昔發視左右  
無孔遂失所在瑤家積年無他禍福也大興中  
吳郡府舍中又得二枚物如初其後太守張茂  
爲興兵所殺尸子曰地中有犬名曰地狼有人  
名曰無傷夏鼎志曰掘地而得狗名曰賈掘地  
而得豚名曰邪掘地而得人名曰聚聚無傷也

此物之自然無謂鬼神而恠之然則與地狼名  
異其實一物也淮南萬畢曰千歲羊肝化爲地  
宰蟾蜍得菰卒時爲鶉此皆因氣作以相感而

惑也

法苑  
珠林

晉泰興二年吳人華隆好弋獵畜一犬號曰的  
尾每將自隨隆後至江邊被一大蛇圍身犬遂  
咋蛇死焉而華隆僵仆無所知矣犬徬徨嗥吠  
往復路間家人恠其如此因隨犬往隆悶絕委  
地載歸二日乃蘇隆未蘇之際犬終不食自此

廣博物志 卷之四十七  
愛惜如同親戚焉

幽明錄

晉世王彪之年少未官嘗獨坐齋前有竹忽聞大歎聲彪之惕然恠似其母因往看之見母衣服如昔彪之跪拜欷歔母曰汝方有奇厄自今以去當見一白狗若能東行出千里三年然後可得免災忽不復見彪之悲悵達旦旣明獨見一白狗常隨行止便經營行裝將往會稽及出千里外三年乃歸齋中復聞前聲往見母如先謂曰能用吾言故來慶汝汝自今以後年踰八

十位列台司皆如母言

上

嘉興縣朱休之有一弟宋元嘉中兄弟對坐家有一犬來向休之蹲徧視二人遂搖頭而笑曰言我不能歌聽我歌梅花今年故復可柰汝明年何其家驚懼斬犬榜首路側至來歲梅花時兄弟相鬪並被囚繫經歲得免至夏舉家時疾兄及弟皆死

述異記

晉懷帝永嘉中嘉興張林有狗名阿永時天下饑荒狗行欲倒林言阿永汝得肉故健今餓不

復行耶狗忽語云我道天下人饑死狗語不已

聞者怖死走時天下荒亂帝沒於胡

廣古今五行記

張天錫夢一綠色狗其形甚長從城東南入欲

咋之天錫床上避匿乃墮地後苟萇來破姑臧

著綠地錦袍從東南門入一如所夢

十六國春秋

太叔王氏後娶庾氏女年少色美王年六十常

宿外婦深無忻後忽一夕見王還嬾婉兼常晝

坐因共食奴從外來見之大驚以白王王遽入

僞者亦出二人交會中庭俱着白恰衣服形貌

如一真者便先舉杖打僞者僞者亦報打之二

人各勅子弟令與手王兒乃突前痛打是一黃

狗遂打殺之王時爲會稽府佐門士云恒見一

老黃狗自東而來其婦大耻病死

搜神記

鄱陽趙壽有犬蠱時陳岑詣壽忽有大黃犬六

七羣出吠岑後余相伯歸與壽婦食吐血幾死

乃屑桔梗以飲之而愈蠱有恠物若鬼其妖形

變化襍類殊種或爲狗豕或爲虫蛇其人不自

形狀行之於百姓所中皆死

上

謝安於後府接賓婦劉氏見狗啣謝頭來久之乃失所在婦具說之謝容色無易是月而薨異死

許長史所使人盜他家狗六頭於長史竈下蒸

煮共食之長史何以不檢校使腥臭之氣薰染

殺飯既食而步上道亦已犯真人之星也陶隱居真

誥

王思微性好潔淨在宅有犬汙柱思微令門生

洗之意猶不已便令刮削復言未足遂令易柱

金樓子

張彪敗後與妻楊氏去惟常所養一犬名曰黃

倉在彪前後未曾刻有捨離乃還入若邪山中

沈恭說陳文遣章昭達領千餘兵重購之并圖

其妻彪賊未覺黃倉驚吠劫來便噬一人中喉

卽死及彪被害黃倉嗥呌宛轉血中陳書

陶弘景云裴真君好養白犬白鷄犬名白靈鷄

名白精學道之士或居山林此可以辟邪御覽

爾時有諸估客欲詣他國其諸商人共將一狗

至於中路諸賈頓息伺人不看狗便盜肉眾人

高僧傳卷之四十七  
高僧傳  
而折其脚棄野而去時舍利佛天眼見狗癡  
躡饑餓困篤垂死著衣持鉢入城乞食得已飛  
至狗所慈心憐愍以食施與狗得其食活命歡  
喜既爲說微妙之法狗便命終生舍衛國婆羅  
門家後舍利佛獨行乞食婆羅門見而問焉尊  
者獨行無沙彌耶舍利佛言我無沙彌聞卿有  
子當用見與婆羅門言我有一子字曰均提年  
既孤幼不任使令比前長大當用相與後至七  
歲以其兒付令使出家便受其兒將至祇桓聽

爲沙彌漸爲說法心開意解得阿羅漢果功德  
悉備均提沙彌始得道已自以智力觀過去世  
本造何行遭聖獲果觀見前身作一餓狗蒙和  
尚恩今獲人身并得道果欣然心內發而自念  
言我蒙師恩得脫諸苦今當盡身供給所需求  
作沙彌不受大戒佛告阿難由過去世迦葉佛  
時均提出出家少年聲好巧讚唄人所樂聽有一  
老僧音聲濁鈍不能經唄已得羅漢功德皆具  
年少比丘自恃好聲見而呵之聲如狗吠時老

比丘便呼年少汝識我不我得羅漢儀式悉具  
年少聞說心驚毛豎惶怖自責卽於其前懺悔  
過咎由其惡言五百世中常受狗身由其出家  
持淨戒故今得見我蒙得脫賢愚經

昔有沙門晝夜誦經有狗伏床下一心聽經不  
復念食如是積年命盡得人形生舍衛國中作  
女人長大見沙門分衛便走自持飯與沙門歡  
喜後作比丘尼應得真道譬喻經

舍利弗以一鉢飯上佛佛卽迴施狗而問舍利  
弗誰得福多舍利弗言如我解佛法義佛施狗  
得福多若據敬法重人識位修道敬田卽勝故  
智度論○以下豕

鄭縣人賣豚人問其價曰道遠日暮安暇語汝  
韓子

孔子窮陳蔡之間藜蒸不糲子路烹豚孔子不  
問肉所由來卽食之墨子

朔人獻燕昭王以大豕曰養奚若使曰豕也非  
大豕不居非人便不珍今年百二十矣人乃豕



仙王乃命豕宰養之十五年大如沙獮足如不勝其體王異之命衡官橋而量之折橋豕不量又命水官舟而量之其重千鈞其巨無用燕相謂王曰奚不亨之王乃命宰夫膳之豕既死乃見夢於燕相曰造化勞我以豕形食我以人穢吾患其生久矣仗君之靈得化吾生始得爲魯津之伯而浮舟者食我以粳糧欣君之惠將報子焉後燕相遊於魯津而赤龜啣夜光而獻符子昔有司原氏者獵中野鹿斯東奔司原縱謀之

西方之衆有逐豨者聞司原之謀也競舉音而和之司原聞音之衆則反輟已之逐而往伏焉遇夫豨司原喜而自以獲上瑞玕禽也盡芻豢彈困倉以養之豕俛仰嚶呶爲作容聲司原愈蓋玕之居無何烈風興而澤雨作灌巨豕而惡塗淪遂駭懼真聲出乃知是家之艾豨耳此隨聲逐響之過也今世主之於士也目見賢則不敢用耳聞賢則恨不及則亦懼失麟鹿而獲艾豨柰何其不知者也未遇風之變者故也

論衡

漢文翁常起田斫柴爲晡夜有百十野猪臯載土著柴中比曉塘成稻常收常欲斷一大樹欲斷處去地一丈八尺翁先咒曰吾得二千石斧當著此處因擲之正斫所欲後果爲蜀郡太守

小說

莎車王殺于闐王于闐大都末出城見野豕欲搏之乃人語曰無殺我我爲汝殺莎車將軍都

末異之即與兄弟共殺莎車王

張璠漢記

永嘉中壽春城內有豕生人兩頭而不活周馥

取而觀之識者云豕北方畜胡狄象兩頭者無

上也生而死不遂也天戒若曰易生專利之謀

將自致傾覆也俄爲元帝所敗

搜神記

晉有一士人姓王在吳郡還至曲阿日暮引船

上當大埭見埭上有一女子年十七八便呼之

留宿至曉解金鈴繫其臂使人隨至家都無女

人因逼猪闌中見母猪臂有金鈴

上

晉杜願永平梓童涪人也家巨富有一男天保

願愛念年十歲泰元三年暴病而死經數月日

家所養猪生五子一子最肥後官長新到願將以作禮捉就殺之有一比丘忽至願前謂曰此猪是君兒也如前百餘日中而相忘乎言竟忽然不見

安陽城南有一亭廟若宿殺人有一書生乃過宿之亭民曰此不可宿前後宿此未有活者書生曰無苦也吾自能諧遂住廟舍乃端坐誦書夜半後有一人著阜单衣來往戶外呼亭主亭主應曰諾亭中有人耶答曰向者有一書生在

此讀書久適休似未寤乃暗嗟而去須臾復有一人冠赤幘者呼亭主亭主應諾亦復問亭中有人耶亭主答如前復暗嗟而去於是書生無他起詣向者呼處微呼亭主亭主亦應諾復問

亭中有人耶亭主答如前乃問向者黑衣來者誰曰北舍母猪也又曰赤冠幘者誰曰西舍老雄鷄父也曰汝復誰耶曰我是老蠍也於是書生密便誦書至明不敢寐天明亭民來視驚曰君何以得活耶書生曰汝促索劍來吾與卿取

魅乃掘昨夜應處果得老蠍大如鞞婆毒長數尺於西家得老雄鷄父北舍得母猪凡殺三物亭毒遂靜

搜神記

僧朗臂脚及手伸縮任懷有若龜藏時若肉聚或住酒席同諸讌飲而嚼噍猪肉不測其來

神傳

釋法聰適遇屠者驅猪百餘頭聰三告曰解脫首楞嚴猪遂繩解散去諸屠大怒將事加手竝矻然不動便歸過悔罪因斷殺業

上

開皇末涇南有人寄宿他舍夜中聞二豕對語其一曰歲將盡阿耶明日殺我供歲何處避之一答曰可向水北姊家因相隨而去天將曉主人覓豕不得意是宿客而詰之宿客言狀主人如其言而得豕

高僧傳○以下猿猴

猿一名叅軍

古今注

張機字仲景南陽人受業於張伯景精於治療一日入桐栢覓藥草遇一病人求診仲景曰子之腕有獸脉何也其人以實具對乃嶧山老猿

也仲景出囊中丸藥畀之一服輒愈明日其人肩一巨木至曰此萬年桐也聊以相報仲景斲爲二槩一曰古猿一曰萬年

古槩記

僕不想歛爾夢搏赤猿其力甚於貔虎良久反覆余乃觀天背地覩穹亦當不爽但僕之不達安得不憂吉乎報我凶乎詳告三日阮藉白繇

君

七賢帖

佛往黎耆闍河邊時世尊鉢比丘鉢共在露處時有獼猴行見樹中有無蜂熟蜜來取世尊鉢

諸比丘遮佛言莫遮此無惡意便持鉢取蜜奉獻世尊不受須待水淨獼猴不解佛意謂呼有虫轉看見鉢邊有流蜜有到水邊洗鉢水湔鉢中持還奉佛佛卽受取佛受已獼猴大歡喜卻行而舞墮坑命終卽生三十三天

僧祇傳

劉宋時錢塘釋智一者善長嘯於靈山澗適養一白猿有時驀山踰澗久而不還一乃吮吻張喉作梵呼之則猿至矣時人謂之白猿梵名一

公爲猿父

高僧傳

涪水素來無猿自僧林棲託以來便有兩頭依林而住有初見者去渡水來其後林出山門猿還洄渡如此非一年月淹久孚乳產生乃有數十有時送林至龍門口佇望而返

神僧傳

有一人種黍於山中常患獼猴食之聞介象有道從乞辟猴法象告無他汝明日往看黍若見猴羣下喚語之曰吾已告介君介君教汝莫食黍此人倉卒直言象欺弄之明日往見羣猴欲下樹試告象言語猴卽各還樹絕迹矣

葛洪神仙傳

南野中伍寺之見社樹上有一猴懷孕便登樹擺殺之夢一人稱神責以殺猴之罪當令重謫乃化爲大蟲入山不知所在

晉大元末徐寂之嘗野行見一女子搵荷舉手摩寂之寂之悅而延住此後來往如舊寂之便患瘦瘠時或言見華房深宇芳茵廣筵寂之與女觴餚宴樂數年其弟晬之聞屋內羣語潛往窺之見數女子從戶後出惟餘一者隱在簣邊晬之逕入寂之怒曰今方歡樂何故唐突忽復

共言云簣中有人醉之卽發看有一牝猴遂殺之寂之病遂愈

異苑

晉大元中丁零王翟昭後宮養一獼猴在妓女房前前後妓女同時懷妊各產子三頭出便跳躍昭方知是猴所爲乃殺猴及子妓女同時號哭昭問之曰初見一年少著黃練單衣白紗袷甚可愛笑語如人

搜神記

後周毀經道釋惠主卽返故鄉南山藏伏惟食松葉異類禽獸同食無聲或有山神送茯苓甘

松香來獲此供養六時行道禽獸隨行禮佛誦經似如聽仰仍爲幽顯受菩薩戒後有獼猴羣其治道主曰汝性躁擾作此何爲曰時君異也佛曰通也深恠其言尋爾更有異祥龍飛獸集香氣充山其類衆矣後有八人採弓材者甚大驚駭便慰主曰聖君出世時號開皇矣卽將出山以事奏聞家預出家

神僧傳

僧朗一名法朗姓許氏南陽人年二十餘欣欲出家尋預剎落棲止無定多住鄂州飲噉同俗

爲時共輕常養一猴一犬其狀偉大皆黃赤色  
不狎餘人惟附於朗日夕相隨未嘗舍離若至  
食時以木盂受食朗噉飽已餘者用飼之旣問  
器食訖猴便取盂戴之騎犬背上先朗而行人  
有奪者輒爲所咋朗任犬盤遊畧無常度

上

吠舍釐國南有獼猴爲佛穿池池西羣猴持佛  
鉢上樹取蜜處池南猴奉佛蜜處

西域傳

近雪山下有三禽獸共住一鷄鳥二獼猴三象  
是三禽獸初互相輕慢無恭敬行同作是念我

等何爲不相恭敬若前生者應供養尊重教化  
我等爾時鷄鳥獼猴問象言汝念過去憶何事  
時是處有大萐芡樹象言我小時行此樹在我  
腹下過象鷄問獼猴汝憶何事答言我小時坐  
地捉此樹頭按令倒地象語獼猴汝年大我我  
當敬汝爲我說法象獼猴問鷄鳥言汝憶何事  
答言彼有大萐芡樹我噉其子於此大便乃生  
斯樹長大如是是我所憶獼猴語鷄汝年大我  
我當供養汝汝當爲我說法爾時象恭敬獼猴



從聽受法為餘象說獼猴恭敬鷄鳥從聽受法

為餘獼猴說法鷄鳥為餘鷄鳥說法依四分律鳥騎猴上

猴乘象上處處遊行教化說法此三禽獸先喜殺盜媯妄語後

相誠止即捨此過命終皆生天上法苑珠林

佛告諸比丘過去世時有城名波羅國名伽尸

於空閑處有五百獼猴遊行林中到一尼俱律

樹下樹下有井井中有月影現時獼猴主見是

月影語諸伴言月今日死落在井中當令出之

莫令世間長夜闇冥共作議言云何能出時獼

猴主言我知出法我捉樹枝汝捉我尾展轉相

連乃可出之時諸獼猴即如主語展轉相捉小

未至水連獼猴重樹弱枝折一切獼猴墮井水

中爾時樹神便說偈言是等騃榛獸癡眾共相

隨坐自生苦惱何能救出月

昔迦尸國王名曰滿面毗提希國有一淫女端

正殊妙爾時二國常相怨疾傍有佞臣向迦尸

王歎說彼國有媯女端正世所希少王聞是語

心生惑著遣使從索彼國不與重遣使言求暫

相見四五日間還當發遣時彼國王約勅媼女  
汝之姿態所有技藝精巧悉具足備使迦尸王  
惑著於汝須臾之間不能遠離卽遣令去徑四  
五日尋復喚言欲設大祀須得此女暫還放來  
後當更遣時迦尸王卽遣婦還大祀已訖遣使  
還索答言明日當遣至明日亦復不遣如是妄  
語徑歷多日王心惑著單將數人欲往彼國諸  
臣勸諫不肯受用時仙人山中有一獼猴王聰  
明博達多有所知其婦適死取一雌獼猴諸獼  
猴衆皆瞋呵責此雌獼猴衆所共有何緣獨當  
時獼猴王將雌獼猴走向迦尸國投於王所諸  
獼猴衆皆共追逐旣到城內發屋壞樹不可料  
理迦尸國王語獼猴王言汝今何不以此雌獼猴  
還諸獼猴獼猴王言我婦死去更復無婦王今  
云何欲使我歸王語之言汝獼猴破亂我國那  
得不歸獼猴王言此事不好耶王答言不好如  
是再三王故言不好獼猴王言汝宮中有八萬  
四千夫人汝不愛樂欲致敵國追逐媼女我今

無婦此唯取一汝言不好一切萬姓視汝而活  
爲一媼女云何捐棄國事大王當知媼欲之事  
樂少苦多猶如逆風熱熾炬患者不放必見燒  
害欲爲不淨如彼屎聚欲現外相薄皮所覆欲  
無反復如屎塗毒蛇欲如怨賊詐親附人欲如  
假借必當還歸欲爲可惡如廁生花欲如疥瘡  
而向於火把之轉劇欲如狗齧枯骨涎唾共合  
謂爲有味唇齒破盡不知厭足欲如渴人飲於  
鹹水愈增其渴欲如段肉衆鳥競逐欲如魚戰

貪味至死其患甚大 並上

昔佛在世時遣一羅漢名須曼持佛髮爪至罽

賓國南山之中造佛塔寺中常有五百羅漢維漢日

夕燒香欲遶塔禮拜時山中有五百羅漢猴見僧

遶塔禮拜供養即共負石學僧作塔遶之禮拜

于時天雨山水瀑漲五百羅漢猴一時沒死生切

利天七寶宮殿巍巍無量衣食自然快樂無極

既得生天各自念言我等何緣得來生此即以

天眼觀見前身作其獼猴由學衆僧戲笑作塔

山水所漂命終生此卽共相將齋持香華從天  
下來供養死尸廻詣佛所禮拜問訊佛爲說法  
五百天子一時皆得須陀洹果旣得果已還歸  
天上

法句果經

昔有比丘於空閑樹下坐禪行道樹上有一獼  
猴見比丘食下住其邊比丘以飯與之獼猴得  
食輒行取水以給澡洗如是連月後日食竟忽  
忘不留獼猴以不得食大怒取比丘袈裟上樹  
裂破比丘忿之以杖誤中獼猴卽死餘數獼猴

竝來共舉死獼猴到佛寺中比丘僧知必有所  
以推問其意比丘具說於是佛教自從今日比  
丘每食皆當割省留餘以施蠢動不得盡之

譬喻

論

昔有梵志年百二十少小不娶妻無媼泆之情  
處在深山無人之處以茅爲廬蓬蒿爲席水果  
爲食不積財寶國王聘之不往赴意靜處無爲  
於山藪中與禽獸相娛絕於人路山有四獸一  
名狐二名獼猴三名獺四名兔此之四獸日於

道人所聽經說戒如是積久食諸果菰皆悉訖  
 盡後道人意欲徙去四獸大愁憂情不樂共相  
 議言我曹各行求索供養道人獼猴去至他山  
 得甘果來以上道人給一月糧願止莫去獼亦  
 入水取得大魚以上道人給一月糧願止莫去  
 兔自思念我當用何等供養道人卽念持身供  
 養便取樵以然火作炭往白道人言今我爲兔  
 請入火中作炙以身奉上道人可給一日糧便  
 自投火中火爲不然道人見兔感其仁義哀憫

傷之則自止留佛言爾時梵志者今提和竭佛  
 是爾時兔者今我身是爾時獼猴者今舍利佛  
 是爾時野狐者今阿難是爾時水獼者今日連  
 是也

法苑珠林  
○以下獼

獼以猿爲婦

東晉發  
蒙記

陽羨縣前有大橋下有獼將有兵獼動出穴口  
 西向而嗥

周處風土記

魏明帝遊洛水水中有白獼數頭美靜可憐見  
 人輒去帝欲見之終莫能遂侍中徐景山曰獼

嗜鮐魚乃不避死畫板作兩生鮐魚懸置岸上  
於是羣獺競逐一時執得帝甚嘉之

齊諧記

宋永興縣吏鍾道得重病初差情欲倍常先樂  
白鶴墟中女子至是猶存想焉忽見此女子振  
衣而來卽與燕好是後數至道曰吾甚欲鷄舌  
香女曰何難乃掬香滿手以授道道邀女同舍  
咀之女曰我氣素芳不假此女子出戶狗忽見  
隨咋殺之乃是老獺口香卽獺糞頓覺臭穢

明錄

元嘉十八年廣陵下市縣人張方女道香送其  
夫婿北行日暮宿祠下夜有一物假作其婿來  
云離情難遣不能便去道香俄昏迷惑失常時  
有海陵王纂者能療邪疑道香被魅請治之始  
下一針有一獺從女被內走入前港道香疾便  
愈

河東常醜奴將一小兒湖邊拔蒲暮恒宿空田  
舍中時日向暝見一少女子姿容極美乘小船  
載蓴徑前投醜奴舍寄住因卧覺有臊氣女已

知人意便求出戶外變爲獺

異苑

河東柳慎字子元少樂閒靜不慕榮貴梁天監中自司州遊上元便愛其風景於鍾山之西建業里買地結茅開泉種植隱操如耕父者其左右居民皆呼爲柳父所居臨江水常曳策臨眺忽見前州上有三四小兒皆長一尺許往來遊戲遙聞相呼求食聲慎異之湏臾風濤洶湧有大魚驚躍誤墜洲上羣小兒爭前食之又聞小兒傳呼云雖食不盡留與柳父慎益驚駭乃乘

小舟逕捕之未及岸諸小兒悉化爲獺入水而去慎取巨魚以分鄉里未幾北還洛陽於所居書齋柱題云江山不久計要適暫時心况念洛陽士今來歸舊林是歲天監七年也

窮惟記○以下狐

白狐王者仁智則至

宋書

狐九尾何狐死首丘不忘本也明安不忘危也必九尾者何九妃得其所子孫繁息也於尾者何明後當盛也

白虎通

千年之狐姓趙姓張五百年狐姓白姓康

玄覽

千歲之狐豫知將來千歲之狎變為好友千歲之猿變為老人

抱朴子○又白澤圖云百歲之狼化為美女其名曰知女求為人妻經年則食人呼其名則逃去

夏侯藻母病困將詣淳于智卜有一狐當門向之嗥叫藻愕懼遂馳詣智智曰禍甚急君速歸在嗥處拊心啼哭家人驚惟大小畢出一人恐懼啼哭勿休然其禍僅可救也藻如之母亦扶病而出家人既集堂屋五間拉然而崩

搜神記

有一書生吳中皓首稱胡博士教授諸生忽復不見九月初九日士人相與登山遊觀聞講書

聲命僕尋之見空塚中羣狐羅列見人即走老

狐獨不去是皓首書生

搜神記

吳郡顧旃獵至一崗忽聞人語聲云咄咄今年衰乃與衆尋覓崗頂有一窠是古時冢見一老狐蹲冢中前有一卷簿書老狐對書屈指有所計校乃放犬咋殺之取視簿書是姦人女名已經姦者乃以朱鈎頭所疏名有百數旃女正在簿次



宋酒泉郡每太守到官無幾輒死後有渤海陳  
斐見授此郡憂恐不樂就卜者占其吉凶卜者  
曰遠諸侯放伯裘能解此則無憂斐不解此語  
答曰君去自當解之斐既到官侍醫有張侯直  
醫有王侯卒有史侯董侯等斐心悟曰此謂諸  
侯乃遠之卽卧思放伯裘之義不知何謂至夜  
半後有物來斐被上斐覺以被冒取之物遂跳  
跟訶訶作聲外人聞持火入欲殺之魅乃言曰  
我實無惡意但欲試府君耳能一相赦當深報

君恩斐曰汝爲何物而忽干犯太守魅曰我本  
千歲狐也今變爲魅番化爲神而正觸府君威  
怒甚遭困厄我字伯裘若府君有急難但呼我  
字便當自解斐乃喜曰真放伯裘之義也卽便  
放之小開被忽然有光赤如電從戶出明夜有  
敲門者斐問是誰答曰伯裘問來何爲答曰白  
事問白何事答曰北界有賊奴發也斐按發則  
驗每事先以語斐於是境界無毫髮之奸而咸  
曰聖府君後經月餘主簿李音共斐侍婢私通

既而懼爲伯裘所白遂與諸侯謀殺斐伺傍無人便與諸侯持杖直入欲格殺之斐惶怖卽呼伯裘求救我卽有物如伸一疋絳割然作聲音侯伏地失魂乃以次縛取考詢皆服云斐未到官音已懼失權與諸侯謀殺斐會諸侯見斥事不成斐卽殺音等伯裘乃謝斐曰未及白音姦情乃爲府君所雖効微力猶用慚惶後月餘與斐辭曰今後當上天去不得復與府君相往來也遂去不見並上

佛告諸比丘乃往古昔有一摩納在山窟中誦刹利書有一野狐住其左右專聽誦書心有所解作是念言我解此書語足堪作諸獸王作是念已便起遊行逢羸瘦野狐便欲殺之彼言何故殺我答言我是獸王汝不伏我是以相殺彼言願莫殺我我當隨從於是二狐伏一切象復以衆象伏一切虎復以衆虎伏一切獅子遂權得爲王既作王已復作是念我今爲獸中王不應以獸爲婦便乘白象率諸羣獸不可稱數圍

迦夷城數百千市王遣使問汝諸獸何故如是  
 野狐答言我是獸王應娶汝女與我者善若不  
 與我當滅汝國還白如此王集羣臣共議唯除  
 一臣皆云應與所以者何國之所恃唯賴象馬  
 我有象馬彼有獅子象馬聞氣惶怖伏地戰必  
 不如為獸所滅何惜一女而喪一國時一大臣  
 聰叡遠略而白王言臣觀古今未曾聞見人王  
 之女與下賤獸臣雖弱昧要殺此狐使諸羣獸  
 各各散走王即問言何計將兵馬出大臣答言

丑徂剋期戰日先當從彼求索一願願令獅子  
 先戰後吼彼謂我畏必令獅子先吼後戰王至  
 戰日當勅城內皆令塞耳王用其語遣使刻期  
 共求上願至于戰日復遣信求然後出軍軍鋒  
 欲交野狐果令獅子先吼野狐聞之心破七分  
 便於象上墜落于地於是羣獸一時散走

法苑珠林

以下

徐廣曰狸一名不來

封禪書注

靈狸一體自為夫婦故能媚人

異物志

殘形操曾子夢一狸不見其首以為不祥而作是曲

齊惠公之妾蕭同叔子見御有身以其賤不敢言也取薪而生頓公於野又不敢舉也狸乳鷓覆之人見而収之因名無野

搜神記

清沙令徐季龍使人行獵令管輅筮其所得輅曰當獲小獸復非食禽雖有爪牙微而不強雖有文章蔚而不明非虎非雉其名曰狸獵人暮

歸果如輅言

魏志

冀州刺史裴徵辟管輅為文學自卦吉凶云當

見三狸果見之

管輅別傳

吳縣費升為九里亭吏夜有女子來寄宿升彈琵琶女和歌云精氣感冥昧所降若有緣嗟我遘良契寄欣宵夢間

其一

成公從弦超蘭香降

張碩荀云冥分結纏綿在今夕

其二

佇我風雲

會正俟今夕遊申心雖未久中念已綢繆

其三

及明為羣狗嚙死乃大狸也

異苑

晉博陵劉伯祖為河東太守所止承塵上有神

能語京師詔書每下消息輒預告伯祖伯祖問其所食啗欲得羊肝于前切之腐隨刀不見兩羊肝盡有一老狸露形在案前視者舉刀欲斫之伯祖呵止自舉著承塵上須臾大笑曰向者噉肝醉忽失形與府君相見大慚愧後伯祖當爲司隸神復先語伯祖某月某日書當到到期如言及入司隸府神隨逐承塵上輒言省內事伯祖大恐懼謂神曰今職在刺舉左右貴人聞神在此得以相害神答曰如府君所慮當相捨

去遂絕無聲

法苑珠林

晉太元中瓦棺佛圖前淳于矜年少潔白送客至石頭城南逢一女子美姿容矜悅之因訪問二情旣洽將入城北角共盡忻好便各分別期更剋集將欲結爲伉儷女曰得婿如君死何恨我兄弟多矣一竝在當問我翁母矜便令女歸問其翁母翁母亦願許之女因敕婢取銀百觔絹百匹助矜成婚經久生兩兒當作秘書監明果騶卒來召車馬導後前後部鼓吹經少日有

獵者過覓衿將數十狗徑突入咋婦及兒竝成  
狸絹帛金銀竝是草及死人骨 玄恠錄

晉義熙中烏傷人孫乞齋父書到郡達石亭天  
雨日暮顧見一女戴青繖年可十六七姿容豐  
艷通身紫衣爾夕電光照室乃是大狸乞因抽  
刀斫殺繖是荷葉 異苑

丹陽縣駱慶婦生一男一虎一狸狸虎毛色班  
黑牙爪皆備卽殺之兒經六日而死母不異 異苑  
樂廣爲河南尹先是官舍多妖怪常白日外戶

自開二子凱橫等皆驚悸廣獨自若顧見牆有  
孔使人掘墻得狸而殺之其恠遂絕 異苑

猫一名蒙貴一名烏圓 西陽雜俎

張搏好猫其一曰東守二曰白鳳三曰紫英四  
曰怯憤五曰錦帶六曰雲圖七曰萬貫皆價值

數金次者不可勝數 記事珠

宛野謂鼠爲鼯 宛新野今皆在南陽音錐

鼠鼯鼠鼯鼠鼯鼠鼯鼠鼯鼠鼯鼠鼯鼠鼯鼠鼯  
鼠鼯鼠鼯鼠鼯鼠鼯鼠鼯鼠鼯鼠鼯鼠鼯鼠鼯

鼠鼯鼠

廣雅

山有易腸鼠一月吐易其腸束廣微所謂唐鼠者也

豫章紀

玉策記稱鼠壽三百歲滿一百歲者則色白善憑人而卜名曰仲能知一年中吉凶及千里外事也

抱朴子

江中魚化為蝗而食五穀者百歲為鼠

義鼠形如鼠每行過相咬尾三五為羣驚之則散俗云見之者有吉兆成都有之

異苑

貂出句麗國常有一物共居穴或見之形貌類人長三尺能制貂愛樂刀焉其俗人欲得貂皮以刀投穴口此物夜出穴置皮刀邊須人持皮去乃敢取刀

異苑

挹樓國出好貂今所謂挹樓貂是也

魏志

漢昭帝元鳳元年九月燕有黃鼠銜其尾舞王宮端門中王往視之鼠舞如故王使吏以酒脯飼鼠舞不休一日一夜死時燕王旦謀反將死之象也京房易傳曰誅不原情厥妖鼠舞門

神搜

漢成帝建始四年九月長安城南有鼠銜黃蘗  
柏葉上民冢柏及榆樹上爲巢桐柏爲多巢中  
無子皆有乾鼠矢數升時議臣以爲恐有水災  
鼠盜竊小蠱夜出晝匿今正晝去穴而登木象  
賤人將居貴顯之占桐柏衛思后園所在也其  
後趙后自微賤登至尊與衛后同類趙后終無  
子而爲害明年有鳶焚巢殺子之象云京房易  
傳曰臣私祿罔千厥妖鼠巢

中山王周南爲襄邑長忽有鼠從穴中出在廳  
事上語曰王周南爾以某月某日當死周南急  
往不應鼠還穴後至期復出更冠幘阜衣而語  
曰周南爾日中當死亦不應鼠復入穴須臾復  
出出復入轉行數語如前日適中鼠復曰周南  
爾不應死我復何道言訖顛蹶而死卽失衣冠  
所在就視之與常鼠無異

並上

竇攸治爾雅舉孝廉爲郎世祖與百寮大會靈  
臺得鼠身如豹文熒有光澤世祖異之問羣臣



莫知攸對曰名巽詔問何以知之攸曰見爾雅  
詔案視書如攸言賜帛百疋詔諸侯子弟從攸  
受爾雅 竇氏家傳

鄧璞過江宣城太守殷祐引爲參軍時有物大  
如水牛灰色卑脚脚數象胸前尾上皆白大力  
而遲鈍來到城下衆咸異焉祐使人伏而取之  
令璞作卦遇遯之蠱其卦曰艮體連乾其物壯  
巨山前之畜匪兇匪虎身與鬼并精見二午法  
當爲禽兩翼不許遂被一創還其本豎按卦名  
之是爲驢鼠卜適了伏者以戟刺之深尺許遂  
去不復見郡網紀上祠請殺之巫云廟神不悅  
曰此是邾亭驢山君鼠使詣荆山暫來過我不  
須觸之其精妙如此 晉書

晉太康中會稽縣螿蜺及羊皆化爲鼠

永嘉五年十一月有蠹鼠出延陵郭璞筮之遇  
臨之益曰此郡之東縣當有妖人欲稱制者尋  
亦自死矣 搜神記

淳于智字叔平有思義能易筮善厭勝之術高

平劉柔夜卧鼠嚙其左手中指以問智智曰是欲殺君而不能當爲君使其反死乃以朱書手腕橫文後三寸作田字辟方一寸二分使露手以卧明旦有大鼠伏死手前

晉書

晉趙侯少好諸術姿形頽陋長不滿數尺以盆盛水閉目作禁魚龍立見侯有白米爲鼠所盜仍被頭把刀畫地作獄四面門向東嘯羣鼠俱到咒之曰凡非噉者過去止者十餘剖腹看藏有米在焉曾徒跣履因仰頭微笑吟雙履自

至人有笑其形容者便陽設以酒盃向口卽掩鼻不脫仍啟顙謝過者地不舉永康有騎石山山上有石人騎石馬侯以印指之人馬一時落

首今猶在山下

異苑

晉隆安中高惠清爲太傅主簿忽一日有羣鼠更相啣尾自屋梁相連至地清尋得瘧疾數日而亡

上

南平國蠻兵義熙初從衆來姑熟便有鬼附之聲啣啣細長或在簷宇之際或在庭樹上若占

吉凶輒先索琵琶隨彈而言于時郝竒爲府長  
史問當遷官云不久持節也尋爲南蠻校尉予  
爲國郎中親領此上荊州俗語云是老鼠所作  
名曰鬼侯

靈鬼志

宋景平中東陽大水永嘉蔡喜夫避住南壠夜  
有大鼠復水而來伏喜夫奴牀角愍而不犯每  
以飯與之水勢旣退喜夫得返故居鼠以前脚  
捧青囊有三寸許珠留置奴牀前啾啾如欲語  
也

異苑

釋道舜靜處林泉庇道自隱言常含笑談述清  
遠常止澤州羊頭山神農定藥之所結宇茅茨  
餘無蓄積日唯一食常坐卒歲感蛇鼠同居在  
繩床下各享產育不相危惱又致虎來蹲踞其  
側便爲說法

神僧傳

大興中衡陽區純作鼠市四方丈餘開四門門  
有一木人縱四五鼠於中欲出門本人輒以椎  
椎之

晉陽秋

王肅造逐鼠丸以銅爲之晝夜自轉

太平廣記

宋孝武大明七年春太湖邊忽多鼠其年夏水至悉變成鯉魚民人一日取轉得三五十斛明年大饑

宋書

齊永明中會稽鍾山有人姓蔡不知名山中養鼠數十頭呼來卽來遣去卽去時謂之謫仙

南齊書

梁天監中有蜀闖髡杰薺黠仇胥四公謁武帝帝見之甚悅因命沈隱侯約作覆將與百寮共射之時太史適獲一鼠約匣而緘之以獻帝筮

之遇蹇之噬嗑帝占成羣臣受命獻卦者八人有命待成俱成帝占夬寘諸青蒲申命闖公揲著對曰聖人布卦其象吉矣依象辯物何取異之請從帝命卦時八月庚子日巳時闖公奏請沈約舉帝卦上一著以授臣旣撰占成置于青蒲而退讀帝占曰先蹇後噬嗑是其時內艮外坎是其象坎爲盜其鼠也居蹇之時動其見噬嗑其拘繫矣噬嗑六爻四無咎一利艱貞非盜之事上九荷校滅耳凶是因盜獲矣必死鼠也

羣臣舞蹈呼萬歲帝自矜其中頗有喜色次讀  
八臣占詞或辯於色或推於氣或取於象或演  
於爻或依鳥獸龜龍陰陽飛伏其文雖玄遠然  
皆無中者未啟闢公占曰時日王相必生鼠矣  
且陰陽晦而入文明從靜止而之震動失其性  
必就擒矣金盛之月制之必金子爲鼠辰與艮  
合體坎爲盜又爲隱伏隱伏爲盜是必生鼠也  
金數於四其鼠必四離爲文明南方之卦日中  
則昃况陰類乎晉之繇曰死如葉如實其事也  
日歛必死旣見生鼠百寮失色而尤闢公占辭  
有四今者唯一何也公曰請剖之帝性不好殺  
自恨不中及至日昃鼠且死矣因令剖之果姪  
三子是日帝移四公於五明殿西閣示更親近  
其實囚之唯朔望伏臘得於義賢堂見諸學士  
然有軍國疑議莫不參預焉

梁四公記

吳興姚察少時宿于人家夜聞一人呼曰幼卿  
曰諾一人曰幼卿視我豈殺人者哉今人欲藥  
我我不能藥人乎旣去察異之因效其聲呼曰

幼卿曰諾曰而與而語者何人也陳二公公即鼠也察曰而何人答曰我床頭顛面盆也公平生愛惜物命當不害我與家主買我歸能福公使公至吏部尚書者我也明晨聞哭問其故乃主人辨色與欲會客食隔宿飯未盡半盃即仆地暴死察乃知其以藥毒鼠而為鼠所毒也遂買其銅盆以歸戒人勿得毒鼠自後察家日以昌果仕至吏部尚書今人呼顛面盆為幼卿鼠為陳二公由此也

太平廣記

于闐國路中大蹟唯有鼠壞形大如蝟毛金銀色昔匈奴來寇王祈鼠靈乃夜齧人馬兵箭斷壞自然走退

西域傳

西域有鼠王國鼠之大者如狗中者如兔小者如常大鼠頭悉已白然帶金環枷商估有經過其國不先祈祀者則嚙人衣裳也得沙門咒願更獲無他釋道安昔至西方親見如此俗諺云鼠得死人目睛則為王

異苑

過去世時有一猫狸饑渴羸瘦於孔穴中伺求

鼠子若鼠子出當取食之有時鼠子出穴遊戲時被猫狸疾取吞之鼠子身小生入腹中已食其內藏食內藏時猫狸迷悶東西狂走空宅塚間不知何止遂至於死如是比丘有愚癡人依聚落住晨朝着衣持鉢入村乞食不善護身不守根門心不繫念見諸女人起不正思惟而取色相發貪欲心已欲火熾然燒其身心已馳走狂逸不樂精舍捨戒退滅此愚癡人長夜常得不饒益苦是故比丘當如是學善護其身守諸

根門繫心正念

法苑珠林

廣博物志卷之四十七

終



廣州物志

卷之四十七

全

廣東



廣博物志卷之四十八

隴西董斯張纂

武唐姚士麟訂

鳥獸五 異鳥 異獸

復州之山有鳥焉其狀如鷓而一足彘尾其名

曰跂踵見則其國大疫 銘曰跂踵為鳥一足似夔不為樂與反以來悲

○山海經

符愚之山有鳥名鵠其狀如翠而赤喙可以衛

火

嶠山上有鳥焉其狀如梟而赤身白首名曰竊脂可以衛火

有鳥焉其狀如雞而三首六目六足三翼其名曰鶡鶩食之無臥

青丘之山有鳥焉其狀如鳩名曰灌灌佩之不惑

禱過之山有鳥焉其狀如鳩而白首三足人面其名曰瞿如

柎山有鳥焉其狀如鴟而人手其音如痺其名曰鵠其鳴自號也見則其縣多放士

小華之山鳥多赤鷲赤鷲山雞之屬胃復洞赤冠金皆黃頭綠尾中有赤

毛光彩鮮明音作蔽或作鷲可以禦火

英山有鳥焉其狀如鶉黃身而赤喙其名曰肥遺食之已癘可以殺虫

有鳥焉其狀如翟而赤名曰胜遇音姓是食魚其

音如錄見則其國大水

萊山其鳥名羅羅是食人

三危之山有鳥焉一首三身其狀如鸚其名曰

鷓鴣

發鳩之山有鳥焉其狀如鳥文首白喙赤足名

曰精衛其鳴自詒是炎帝之少女名曰女娃炎帝

神農也娃惡佳反語誤或作階女娃遊於東海溺而不返故為

精衛常銜西山之木石以堙於東海

首山有谷曰機谷多馱鳥音如鉗鈇之鈇其狀如梟而

三目有耳其音如錄食之已墊

鴛鳥鷓鳥次瞻兩音其色青黃所經國亡此應禍之鳥即今梟

鴛鷓之類在女祭北鴛鳥人面居山上二曰維鳥青

鳥黃鳥所集

有五彩之鳥有冠名曰狂鳥爾雅云狂夢鳥即此也

弇州之山有五彩之鳥仰天張口名曰鳴鳥爰

有百樂歌儻之風

互人之國有青鳥身黃赤足六首名曰觸鳥

松果之山有鳥焉其名曰鳩渠其狀如山雞黑

身赤足可以已曝謂皮皴起也

翠山其鳥多鷓狀如鵲赤黑兩首四足可以禦

火

鹿臺之山有鳥焉其狀如雄雞而人面名曰鳧  
侯其鳴自叫也見則有兵

有鳥焉其狀如鳧而一翼一目相得乃飛名曰  
蠻蠻見則天下大水

鍾山有神其子曰鼓其狀人面而龍身是與欽  
鵠殺葆江于崑崙之陽葆或作祖帝乃戮之鍾山之

東曰崑崖欽鵠化爲大鵠其狀如鵠而黑文白  
首赤喙而虎爪其音如晨鵠見則有大兵鼓亦  
化爲鵠鳥狀如鵠赤足而直喙黃文而白首其

音如鵠見卽其色大旱

章莪之山有鳥焉其狀如鶴一足赤文青質而  
白喙名曰畢方見則其邑有譌火尚書故實云武帝時有獨

足鶴人皆不知以爲怪異東方朔奏曰此山海經所謂畢方鳥也驗之果是

有鳥焉其狀如鳥三首六尾而善笑名曰鵠鵠  
服之使人不厭又可以禦凶

上申之山其鳥名當扈其狀如雉以其髯飛食  
之不眴目

有鳥焉其狀如鵠而人面蝨身犬尾其鳴自號

也見則其邑大旱

有鳥焉其狀如鳥五采而赤文名曰鵠鵠是自  
爲牝牡食之不疽

號山其鳥多寓狀如鼠而鳥翼其音如羊可以  
禦兵

有鳥焉羣居而朋飛其毛如雌雄名曰鳩其鳴  
自呼食之已風

有鳥焉其狀如雉而文首白翼黃足名曰白鳩  
食之已嗌痛可以已痢

痢癘  
病也

有鳥焉其狀如雌雄而人面見人則躍名曰竦  
斯

有鳥焉其狀如鳥人面名曰鶩鶩宵飛而晝伏  
食之已暍

有鳥焉其狀如鵠白身赤尾六足其名曰鵠是  
善驚其鳴自設

有鳥焉其狀如鳥首白而身青足黃是名曰鴈  
鴈其鳴自設食之不饑

景山有鳥焉其狀如蛇而四翼六目三足名曰

酸與其鳴自設見則其邑有恐

小侯之山有鳥焉其狀如鳥而白文名曰鳩鵲  
軒轅之山有鳥焉其狀如梟而白首其名曰黃  
鳥其鳴自設食之不妬

有鳥焉其狀如雞而鼠毛其名蜚鼠見則其邑  
大旱

有鳥焉其狀如鳧而鼠尾善登木其名曰絜鉤  
見則其國多疫

廆山有鳥焉狀如山雞而長尾赤如丹火而青  
喙名曰鴝鵒服之不昧

支离之山有鳥焉其名曰嬰勺其狀如鵲赤  
赤目赤喙白身其尾若勺其鳴自呼

董理之山有鳥焉其狀如鵲青身白喙白目白  
尾名曰青耕可以禦疫其鳴自叫

王母之山有三青鳥赤首黑目一名曰大鷲一  
名少鷲一名曰青鳥

有五色之鳥人面有髮爰有青鷲音青黃鷲音黃  
鳥黃鳥其所集者其國亡

丑陽之山有鳥焉其狀如鳥而赤足名曰馭餘

音如枳可以禦火

踰次之山有鳥焉其狀如梟人面而一足名曰

橐蜚冬見夏蟄服之不畏雷

盧其之山其中有鷺鵒狀如鴛鴦而人足見則

其國多土功

有鳥焉名曰鷓其狀如鳧青身而赤目赤尾食

之宜子

梁渠之山有鳥焉其狀如夸父四翼一目犬尾

名曰鷖其音如鵲食之已腹痛可以止衄治洞下也

天帝之山有鳥焉其狀如鶉黑文而赤翁名曰

櫟食之已痔

有鳥焉其狀如鴟而人足名曰數斯食之已癭

有鳥焉其狀如雌雉而五彩以文是自爲牝牡

名曰象蚘

有鳥焉其狀如雞而白首鼠足而虎爪其名曰

甌雀食人

有鳥焉其狀如蜂大如鴛鴦名曰欽原蠶鳥獸

廣雅

卷之四

六

高祖堂

則死蠹木則枯

有鳥焉其名曰鶉鳥是司帝之百服並上

西申以鳳鳥氏羗以鸞鳥巴人以比翼鳥方煬

以皇鳥蜀人以文翰文翰者若臯雞方人以孔

鳥奇幹善芳善芳者頭若雄雞佩之令人不昧

蠻陽之翟山雞也倉吾翡翠周書

神鳥者赤神之精也知音聲清濁和調者也雖

赤色而備五采雞身鳴中五音肅肅雝雝喜則

鳴舞樂幽隱風俗從則至宋書

同心鳥王者德及遐方四夷合同則至

比翼鳥王者德及高遠則至並上○又拾遺記曰比翼鳥多力狀

如鷓鴣衝南海之丹況巢崑崙之玄木遇聖則來集以表周公輔聖之祥異也

鳥有鵬鷖者重首而屈尾將欲飲于河則必顛

乃銜其羽而飲之人之所有飲不足者不可不

察其羽也韓非子

昌蜀之禽無目之獸無身之頭無首之體精衛

填海玄讓遁生抱朴子

石脩九首畢方人面



千歲之鳥萬歲之禽皆人面而鳥身壽亦如其名並上

鴝鷄俗曰癡鳥見爾雅

鳥一足名獨立見則主勇強河圖

雪山有鳥名爲共命一身一頭識神各異同共報命故曰共命雜寶藏經

迦真隣陀之鳥生於海中王抱觸之身心猗適勝過六欲

若起貪嫉邪佞諂曲欺誑於他或復慳貪積財不施皆生鬼道從鬼命終多生畜生道中受遮吒迦鳥身恒常飢渴受大苦惱唯飲天雨仰口而承不得更飲餘水

兜兜鳥其聲自號正月以後作聲至五月節不知所在其形似鴝鷄

江之右岸富水注之水出涇陽縣之青湓山西北流涇陽縣故豫章之屬矣地多女鳥玄中記曰新陽男子于水次得之遂與共居生二女悉衣羽而去豫章間養兒不露其衣言是鳥落塵

于兒衣中則令兒病故亦謂之飛夜遊女矣水經注  
越地深山中有鳥大如鳩青色名曰冶鳥穿大  
樹作巢如五六升器戶口徑數寸周飾以土埴  
赤白相分狀如射侯伐木者見此樹卽避之去  
或夜冥不見鳥鳥亦知人不見便鳴喚曰咄咄  
上去明日便急上去咄咄下去明日便宜急下  
若不使去但言笑而已者人可止伐也若有穢  
惡及其所止者則有虎通夕來守人不去便傷  
害人此鳥白日見其形是鳥也夜聽其鳴亦鳥

也時有觀樂者便作人形長三尺至澗中取石  
蟹就人火炙之人不可犯也越人謂此鳥是越  
祝之祖也法苑珠林

師曠云南山有鳥名曰羗鷲黃額赤目五色皆  
備說文

春山爰有青鵬執犬羊食豕鹿穆天子傳

崑崙銅柱下有迴屋焉壁方丈上有鳥名曰希  
左翼覆東王公右翼覆西王母其肉若醯僊人  
甘之十洲記

北海有大鳥其高千里頭文曰天維又曰雞左翼文曰鷺右翼文曰勤左足在海北崖右足在海南崖其毛蒼其喙赤其脚黑名曰天雞一名鷺勒頭河東身止海北唯捕鯨魚死則北海水流不犯觸人不干于物或時舉翼飛其兩羽切如雷風驚動天地

神異經

不孝鳥狀如人身犬毛有齒猪牙額上有文曰不孝口下有文曰不慈胸上有文曰不道左脇有文曰愛夫右脇有文曰憐婦

上

骨託之鳥食鐵乾吉之鳥食其子山鳳殺其

奇肱有兩頭之鳥互人有六首之觸

幽州之墟羽山之北有善鳴之禽人面鳥喙八

翼一足毛色如雉行不踐地名曰青鶴其聲似

鐘磬笙竽也世語曰青鶴鳴時太平故盛明之

世翔鳴數澤音中律日飛而不行至禹平水土

棲於川岳所集之地必有聖人出焉自古鑄

諸鼎器皆圖像其形銘讚至今不絕

拾遺記

軒渠國多九色鳥青口綠脛紫翼紅膺紺頂丹

足碧身紺背玄尾亦名九尾鳥亦名錦鳳其青多紅少謂之繡鸞或云是西王母之禽也

有鳥名鴻鵠色似鴻形如禿鶩腹內無腸羽翮附骨而生無皮肉也雄雌相舐則生產

有鳥如鳳身紺翼丹名曰藏珠每鳴翔而吐珠累屋僊人常以其珠飾僊裳並上

有升菡鴨赤色每止于芙蓉上不食五穀唯啣葉上垂露因名垂露鴨一名丹毛鳥洞冥記

有喜日鷺至日出時啣翅而舞名曰舞日鷺

帝昇望月臺時瞑望南端有三青鴨羣飛俄而止於臺上帝悅之至夕鴨宿於臺端日色已暗帝求海肺之膏以爲燈焉取靈瀋布爲纏火光甚微而光色無幽不入青鴨化爲三小童皆着青綺文繡各握鯨文大錢五枚置帝几前身止影動因名輕影錢並上

胥徒國獻沉明石雞色如丹大如燕常在地中應時而鳴聲能徹遠其國聞鳴乃殺牲以祀之當鳴處掘地則得此雞若天下太平翔飛頡頏

以爲嘉瑞亦爲寶雞其國無雞犬聽地中候晷刻道家云昔僊人桐君採石入穴數里得丹石雞舂碎爲藥服之者令人有聲氣後天而死昔漢武帝寶鼎元年西方貢珍怪有琥珀燕置之靜室自於室中鳴翔蓋此類也

拾遺記

南有鳥名鴛鴦形似雁徘徊雲間棲息高岫足不踐地生於石穴中萬歲一交則生雛千歲銜毛學飛聖君之世來入國郊上

有遠飛雞夕則還依人曉則絕飛四海朝往夕

還常銜桂枝之實歸於南山或落地而生高七八尺衆僊奇愛之到以釀酒名曰桂膠嘗一滴舉體如金色陸通嘗餌黃桂之酒祝雞公善養雞得遠飛雞之卵伏之名曰翻明雞如鵠大色紫有翼翼下有目亦曰目羽雞

述異記

吐綬鳥其身大如鶴五色出巴東山中毛色可愛若天晴淑景即吐綬長一尺須臾還吞之陰滯卽不吐

吐綬鳥一名功曹

並上

吳越有異鳥極大四目三足飛鳴山林羅平乃

其聲也占曰國主有兵人相食

蟬史

有鳥名鷓鴣能自爲牝牡

唐韻注

鴉舅似鴉而小黑色嘴邊有毛甚勁能逐鴉鴉見避之一名鴉兢一種似鷹而小蒼色能逐鷹名鷹舅亦名鷹兢

岢嵐鳥出河西赤鳩鎮狀如鳥而大飛翔於障上多不利

雜俎

鷓鴣鳥似雉青身白首

婆利國有鳥名舍利解人語

世樂鳥五色頭上有冠丹喙赤足有道則見

臨海異物志

越王鳥狀似鳶不飲江湖不啜百草不下餌虫魚唯啖木葉糞似薰陸香山人遇之旣以爲香

又治雜瘡

竺山真登羅山疏

獨春鳴聲似春鳴聲多者五穀薄鳴聲少者五穀熟

臨海異物志

廬陵有木客鳥大如鵲千百爲羣不與衆鳥相

厠俗云是古之木客化

述異記

虎鷹能飛捕虎豹身大如牛翼廣二丈

南海去會稽三千里有狗國國中有飛涎鳥似鼠兩翼如鳥而脚赤每至曉諸栖禽未散之前各占一樹口中有涎如膠繞樹飛涎沾洒衆枝葉有他禽之至而如網也然乃食之如竟午不獲卽空中逐而涎惹之無不中焉人若捕得脯治渴其涎每布後半日卽乾自落落卽布之

外荒

記

鳥鳳如喜鵲鳴聲清越如笙簫能變曲妙合官商又能爲百虫之音

堯在位七十年有鸞雛歲歲來集麒麟遊於藪澤梟鴟逃於絕漠有祗支之國獻重明之鳥一名雙睛言雙睛在目狀如雞鳴似鳳時解落毛羽肉翮而飛能搏逐猛獸虎狼使妖災羣惡不能爲害節以瓊膏或一歲數來或數歲不至國人莫不掃洒門戶以望重明之集其未至之時國人或刻木或鑄金爲此鳥之狀置於門戶之

間則魑魅之類自然退伏今人每歲元日或刻木鑄金或畫雞牖上此之遺像也拾遺記

周成王元年貝多國人獻舞雀周公命返之述異記

晉平公出朝其鳥環平公不去平公顧謂師曠

曰是鳳耶曠對曰東方有鳥名為端琦憎鳥而

愛狐今吾君必衣狐裘以朝乎平公曰然說苑

有鳥飛從南方來質白五色皆備集平公之庭

相見如讓公召叔向問之叔向曰吾聞師曠曰

西方有白質鳥五色皆備其名曰翬南方赤質

五色備其名曰搖來為我君臣其祥先至矣瑣語

齊景公謂晏子曰寡人既得寶乘聚萬駟矣方

欲珠懸黎會金玉其得之即奚若晏子曰臣聞

琬琰之外有鳥焉曰金翅民謂為羽豪其為鳥

也非龍肺不食非鳳血不飲其食也常饑而不

飽其飲也常渴而不充生未幾何天其天年而

死珠玉之珍非乃為君之患也符子

子路顏回浴於洙水見五色鳥顏回問子路曰



榮榮之鳥後日顏回與子路又浴於泗水更見前鳥復問曰識此鳥否子路曰識回曰何鳥子路曰同同之鳥顏回曰何一鳥而二名子路曰譬如絲絹煮之則爲帛染之則爲皂不亦宜乎  
小說

大月氏國貢雙頭雞四足一尾鳴則俱鳴武帝置於甘泉故館更以餘雞混之得其種類而不能鳴諫者曰詩云牝雞無晨一云牝雞之晨惟家之索今雄類不鳴非吉祥也帝乃送還西域

至西關雞反顧望漢宮而哀鳴故謠言曰三七末世雞不鳴犬不吠宮中荆棘亂相繫當有九虎爭爲帝至王莽篡位將軍有九虎之號其後喪亂彌多宮掖中生蒿棘家無雞鳴犬吠此雞未至月氏國乃飛于天漢聲似鷓鴣雞翱翔雲裏一名暄雞鷓鴣雞之音相類拾遺記

條支國來貢有鳥名鳩鵲形高七尺解人語其國太平則鳩鵲羣翔昔漢武時四夷賓服有獻馴鵲若有喜樂事則鼓翼翔鳴上

齊郡函山有鳥足青嘴赤黃素翼絳穎名王母使者昔漢武登此山得玉函長五寸帝下山玉函忽爲白鳥飛去世傳山上有王母藥函常令鳥守之

雜俎

昆明國貢嗽金鳥人云其地燃洲九千里出此鳥形如雀而色黃羽毛柔密常翱翔海上羅者得之以爲至祥帝得此鳥畜於靈禽之園飴以真珠飲以龜腦鳥常吐金屑如粟鑄之可以爲器此鳥畏霜雪乃起小屋處之名曰辟寒臺皆

用水晶爲戶牖使內外通光宮人爭以鳥吐之金用飾釵珮謂之辟寒金故宮人相嘲曰不服辟寒金那得帝王心於是媚惑者亂爭此寶金爲身飾及行臥皆懷挾以要寵幸也

拾遺記

勅卑國貢細鳥以方尺之玉籠盛數百頭形如大蠅狀似鸚鵡聲聞數里之間如黃鸝音也國人常以此鳥候時亦名曰候日虫帝置之於宮內旬日而飛盡帝惜求之不復得明年見細鳥集帷幙或入衣袖因名蟬宮內嬪妃皆悅之有

鳥集其衣者輒蒙愛幸至武帝末稍稍自死人  
猶愛其皮服其皮者多爲丈夫所媚

洞冥記

黃龍元年始都武昌時越雋之南獻背明鳥形  
如鶴止不向明巢常對北多肉少毛聲音百變  
聞鐘磬笙竽之聲則奮翅搖頭時人以爲吉神  
是時遷都建業殊方多貢珍奇吳人語訛呼背  
明爲背亡鳥國中以爲大妖不及百年當有喪  
亂背叛滅亡之事散逸奔逃墟無煙火果如斯

言

拾遺記

葛僊公嘗于西峯石壁上石臼中搗藥因遺一  
粟許有飛禽遇而食之遂得不死至今夜靜月  
白風清之時其禽猶作丁當杵臼之聲名之曰  
搗藥鳥有僊人琴高聞僊公得道自東海跨雙  
鯉來訪僊公與之酣飲既醉高臥白雲間酒醒  
雙鯉化爲石矣仙公乃以雙鶴贈之跨之而還  
石至今存

永平元年常山郡獻傷蒐鳥狀如雞毛色似鳳  
帝惡其名棄而不納復愛其毛羽當時博物者

云黃帝殺蚩尤有豸虎誤噬一婦人七日氣不絕黃帝哀之葬以重棺石槨有鳥翔其塚上其聲自呼爲傷菟則此婦人之靈也後人不得其令終者此鳥來集其國園林之中至漢哀平之末王莽多殺伐賢良其鳥亟來哀鳴時人疾此鳥名使常山郡國彈射驅之至晉初干戈始戢四海攸歸山野間時見此鳥憎其名改傷菟爲相弘及封孫皓爲歸命侯相弘之義叶於此矣永平之末死傷多故門嗟巷哭常山有獻遂放

逐之 拾遺記

林邑城外香桂成林時禽異羽翔集間關兼比翼鳥不此不飛鳥名歸飛鳴聲自呼此戀鄉之思孔悲桑梓之敬成俗也俞益期與康伯戕嘗對飛鳥戀土增思寄意謂此鳥其背青其腸赤丹心外露鳴情未達終日歸飛飛不十千路有

萬里何由歸哉

水經注

符堅時有射師經嵩山望見松上有一雙白鳥似鵠而大至樹下又見一蛇長五丈許上樹取

鳥鳥欲飛虵張口翕之鳥不去續紛一餐頃射師發弩射三矢虵落鳥得去樹百餘步山邊整理毛羽須臾雲起雷發射師懼不得旋踵見向鳥徘徊其上毛落紛紛似如相援如此數陣雲息電滅射師得免鳥亦高飛

劉義慶幽明錄

永康元年京師得異鳥莫能名趙王倫使人持出周旋城邑市以問人卽日宮西有一小兒見之遂自言曰服畱鳥持者還白倫倫使更求又見之乃將入宮密籠鳥并閉小兒於戶中明日

往視悉不見

搜神記

大統三年萬春鳥集僊都苑京房易飛侯曰非常之鳥來宿邑中邑有兵周師入鄴之應

隋書○以

下異獸

招搖之山有獸焉其狀如禺而白耳

禺似獼猴而大赤目

長尾今江南山中多有說者不了此物名禺作牛字圖亦作牛形或作猴皆失之也禺字音遇

伏行人走其名曰狺狺食之善走

山海經

青丘之山有獸焉其狀如狐而九尾其音如嬰兒能食人食者不盡

浮玉之山北望具區東望諸毗有獸焉其狀如虎而牛尾其音如吠犬其名曰彘是食人

竹山有獸焉其狀如豚而白毛大如笄而黑端名曰毫彘

踰次之山有獸焉其狀如禺而長臂善投名曰噍

黃山有獸焉其狀如牛而蒼黑大目其名曰犛音敏

有獸焉其狀如犬而豹文其角如牛或作羊其名

曰狡其音如吠犬見則其國大禳晉太康七年邵陵扶夷縣

檻得一獸狀如豹文有二角無前兩脚時人謂之狡疑非此

滑水多水馬其狀如馬文臂牛尾其音如呼

潘侯之山有獸焉其狀如牛而四節生毛名曰

旄牛

敦頭之山印澤多駢馬牛尾而白身一角其音如呼

釐山有獸焉名曰獺音蒼頡其狀如獬犬而有

鱗其毛如彘鬣生靈間也



其音如吟見則郡縣大水

堯光之山有獸焉其狀如人而彘鬣穴居而冬蟄其名曰猾褊其音如斲木見則縣有大繇

洵山有獸焉其狀如羊而無口不可殺也

稟氣自然

其名曰獫狁

錢來之山有獸焉其狀如羊而馬尾名曰羝羊

其脂可以已腊

治體皴

符禺之山其獸多葱鬣其狀如羊而赤鬣

小次之山有獸焉其狀如猿而白首赤足名曰

朱厭見則大兵

崇吾之山有獸焉其狀如禺而文臂豹虎而善投名曰舉父

玉山有獸焉其狀如犬而豹文其角如牛其名曰狡見則其國大穰

三危之山有獸焉其狀如牛白身四角其毫如披篋其名曰微徊是食人

中齒之山有獸焉其狀如馬而白身黑尾一角虎牙爪音如鼓音其名曰駮是食虎豹可以禦



兵

翼望之山有獸焉其狀如狸一目而三尾名曰謹其音如奪百聲是可以禦凶服之已瘳

有獸焉其狀馬身而鳥翼人面蛇尾是好舉人

喜抱舉人名曰孰湖

帶山有獸焉其狀如馬一角名曰臞疏可以辟火

丹薰之山有獸焉其狀如鼠而菟首麋身其音如獐犬以其尾飛名曰耳鼠食之不脰脰大脰也見禪

倉音采也又可以禦百毒

石者之山有獸焉其狀如豹而文題白身名曰孟極是善伏其鳴自呼

邊春之山有獸焉其狀如禺而有鬣牛尾文臂馬蹄見人則呼名曰足訾其鳴自呼

單張之山有獸焉其狀如豹而長尾人首而牛耳一目名曰諸捷善吒行則銜其尾居則蟠其尾

灌題之山有獸焉其狀如牛而白尾其音如計

名曰那父

有獸焉其狀如犬而人面善投見人則笑其名  
山獬其行如風見則天下大風

北嶽之山有獸焉其狀如牛而四角人目彘耳  
其名曰諸懷其音如鳴雁是食人

隄山多馬有獸焉其狀如豹而文身名曰狃

北囂之山有獸焉其狀如虎而白身犬首馬尾  
彘鬣名曰獨裕

梁渠之山其獸多居豎其狀如橐而赤毛其音

如豚

歸山有獸焉其狀如麕羊而四角馬尾而有距

其名曰驪善還還旋舞也其鳴自訶

馬成之山有獸焉其狀如白犬而黑頭見人則  
飛其名曰天馬

秦戲之山有獸焉其狀如羊一角一目目在耳  
後其名曰辣辣其鳴自訶

泰山有獸焉其狀如豚而有珠名曰狢狢

柎狀之山有獸焉其狀如犬六足其名曰從從

豺山有獸焉其狀如夸父而彘毛其音如呼見則天下大水

空桑之山有獸焉其狀如牛而虎文其音如欽其名曰軫軫見則天下大水

雜余之山有獸焉其狀如菟而鳥喙鴟目蛇尾見人則眠名曰狢徐見則螽蝗爲敗

始逢之山有獸焉其狀如狐而有翼其音如鴻雁其名曰獬獬見則天下大旱

鳧麗之山有獸焉其狀如狐而九尾九首虎爪名曰龔姪其音如嬰兒是食人

磴山有獸焉其狀如馬而羊目四角牛尾其音如獐狗其名曰狻狻見則其國多狡客

尸胡之山有獸焉其狀如麋而魚目名曰胡海隅之山有獸焉其狀如牛而馬尾名曰精精

剡山有獸焉其狀如彘而人面黃身而赤尾其名曰合窳其音如嬰兒見則天下大水

秦山有獸焉其狀如牛而白首一目而蛇尾其名曰蜚行水則竭行草則死見則天下大疫

甘棗之山有獸焉其狀狀鼠而文題

狀音也

其名

曰難音那食之已瘦

金星之山多天嬰其狀如龍骨可已瘞

癰瘞也

霍山有獸焉其狀如狸而白尾有鬣名曰肫肫

養之可以已憂

釐山有獸焉其狀如牛蒼身其音如嬰兒是食

人其名曰犀渠

苦山有獸焉其狀如逐赤若丹火善詈名曰山

膏

有獸焉其狀如蜂枝尾而反舌善呼其名曰文

文

虵山有獸焉其狀如狐而白尾長耳名狔狼見

則國內有兵

依軛之山有獸焉其狀如犬虎爪有甲其名曰

鱗善駛牟食者不風

樂馬之山有獸焉其狀如彙赤如丹火其名曰

猴見則其國大疫

倚帝之山有獸焉其狀如鼯鼠白耳白喙名曰

狙如見則其國有大兵

鮮山有獸焉其狀如膜大赤喙赤目白尾見則  
邑有火名曰侈郎

歷石之山有獸焉其狀如狸而白首虎爪名曰  
梁渠見則國大有兵

几山有獸焉其狀如羸黃身白頭白尾名曰聞  
豸見則天下大風

卽公之山有獸焉其狀如龜而白身赤首名曰  
蛻是可以禦火

北海內有素獸焉狀如馬名曰蛩蛩有青獸焉  
狀如虎名曰羅羅

林氏國有珍獸大若虎五彩畢具尾長于身名  
曰騶吾乘之日行千里

大荒之中有山名曰鑿鑿鉅日月所出者有獸  
左右有首名曰屏蓬有赤犬名曰天犬其所下  
者有兵

章莪之山有獸焉其狀如赤豹五尾一角其音  
如擊石其名如猗

陰山有獸焉其狀如狸或作豹而白首名曰天狗

其音如榴榴或作榴猫可以禦凶

邽山有獸焉其狀如牛蝟毛名曰窮奇音如獬

狗是食人

少咸之山有獸焉其狀如牛而赤身人面馬足

名曰窳窳其音如嬰兒是食人

昆吾之山有獸焉其狀如彘而有角其音如號

名曰蠶蜺食之不昧

蔓渠之山有獸焉其名曰馬腹其狀如人面虎

身其音如嬰兒是食人

扶猶之山有獸焉其狀如貉而人目貉或作其

名曰麇音銀或作麇

豐山有獸焉其狀如獫狁赤目赤喙黃身名曰雍

和見則國有大恐

鹿吳之山注于傍水水有獸焉名曰蟲雕

天帝之山有獸焉狀如狗名曰谿邊席其皮者

不蠱

有獸焉狀如鹿而白尾馬足人手而四角名曰

月十卷六  
卷之四十八  
三  
重高勝堂  
櫻如

鉤吾之山有獸焉其目在腋下虎齒人爪其音如嬰兒名曰狍鴟是食人

陽山有獸焉其狀如牛而赤尾名曰領胡食之已狂

耿山多大蛇有獸焉其狀如狐而魚翼其名曰朱孺見則其國有恐

有獸焉其狀如狼赤首鼠目其音如豚名曰獨狙是食人

欽山有獸焉其狀如豚而有牙其名曰當康其鳴自叫見則天下大穰

有獸焉狀如白鹿而四角名曰夫諸見則其邑大水

南海之外赤水之西流沙之東有獸左右有首名曰跖踢有三青獸相并名曰雙雙並上

稷慎大塵穢人前兒前兒若獼猴立行聲似小兒發人鹿人鹿者若鹿迅走俞人雖焉青丘狐

九尾周頭輝羝輝羝者羊也周頭亦黑齒白鹿

續博物志 卷之四十八 三十一 三十七 高勝堂

白馬白民乘黃乘黃者似騏背有兩角漢郊祀書黃庄

一名乘黃義渠以茲白茲白者若白馬鋸牙食虎豹

央林以曾耳曾耳者身如虎豹尾長參其身食

虎豹北唐以閭閭似隃冠山海經縣雍之山其獸多閭閭即隃也似

驢而岐蹄角如渠叟以鼪犬鼪犬者露犬也能

飛食虎豹棲煩以星施星施者珥旄旄牛上盧尾也

以純牛區陽以鼈封鼈封者若堯前後有首規

規以麟州靡費費其形人身反踵自笑笑則上

唇翕其目食人北方謂之吐嘍反踵一作枝踵都郭狴

狴一作生欺羽狴狴若黃狗人面能言高夷嗛羊

嗛羊者羊而四角獨鹿邛邛距虛孤竹距虛不

令支玄貘不令支東北夷不屠何青熊不屠何亦東北夷也東湖

黃罷般吾白虎屠州黑豹禺氏駒駝犬戎文馬

而赤鬣縞身目若黃金名吉皇一作吉黃山海經作吉量之

乘數楚每牛數楚非戎也匈奴狡犬狡犬者巨身四

足周書王會

西南荒中出訛獸其狀若菟人面能言常欺人

言東而西言惡而善其肉美食之言不真矣神異



經

西方中獸如虎毫長三尺人面虎足口牙一丈八尺人或食之獸鬪終不退却唯死而已荒中人張捕之一名倒壽焉

西北有獸其狀如虎有翼能飛食人知人言語聞人鬪輒食直者聞人忠信輒食其鼻聞人惡逆不善輒殺獸往饋之名曰窮奇並上

檮杌一名難訓

東海之魚曰鰈比目而行北方有獸曰婁更食

而更視南方有鳥名曰鵠比翼而飛西方有獸名曰鱉前足鼠後足兔得甘草必銜以遺蛩蛩

距虛

韓詩外傳

瀛州有獸名嗅石其狀如麒麟不食生卉不飲濁水嗅石則知有金玉吹石則開金沙寶璞粲而可用拾遺記

有獸名嗽月形似豹飲金泉之液食銀石之髓此獸夜噴白氣其光如月可照數十畝軒轅之世獲焉上

三角獸先王法度修則至 宋書

一角獸天下平一則至

六足獸王者謀及衆庶則至

比肩獸王者德及矜寡則至

銀鹿刑罰得共民不爲非則至

天鹿者純靈之獸也五色光耀洞明王者道備

則至

角端者日行萬八千里又曉四夷之語明君聖

主在位明達方外幽遠之事則奉書而至

周印者神獸之名也星宿之變化王者德盛則

至

澤獸黃帝時巡狩至於東濱澤獸出能言達知

萬物之情以戒於民爲時除害賢君明德幽遠

則來 卽白澤也○又黃帝內傳云帝巡狩東至

海登恒山於海濱得白澤神獸能言達於

萬物之情問天下鬼神之事自古精氣爲物遊

意爲變者凡萬一千五百二十種白澤言之帝

乃以圖寫之以示天下帝

乃作辟邪之文以祀之 餘者幽隱之獸也有明王在位則來爲時辟除

災害 並上

蜀中西南高山之上有物與猴相類長七尺能  
作人行善走逐人名曰狻國一名馬化或曰獲  
獲伺道行婦女有美者輒盜取將去人不得知  
若有行人經過其旁皆以長繩相引猶故不免  
此物能別男女氣臭故取女男不取也若取得  
人女則爲家室其無子者終身不得還十年之  
後形皆類之意亦迷惑不復思歸若有子者輒  
抱送還其家產子皆如人形有不養者其母輒  
死故懼怕之無敢不養及長與人不異皆以楊

爲姓故今蜀中西南多諸楊率皆是狻國馬化  
之子孫也 搜神記

阿羊九頭而更食國亂乃出 淮南萬  
畢術

駟駟野馬也出北海形似鹿蜀 說文

抵狽二獸名秉心甚靈蓋忠直獸也今華表頂  
上者是 集韻

含利爲獸獸而能謙禮義乃食口無譏 鄭氏  
禮

詞文  
讚

張揖曰飛遠天上神獸也鹿頭而龍身

唐博物志 卷之四  
招賢獻出摩伽陀國性善不于人形如師子若  
國人見賢良相訪則出現

獸則有罷犖獾獠麋麇麕麝戶豹

蜀都賦

昔有懶婦睡機上姑怒之遂走投水化爲此獸  
一枚可得脂三四斛然之照紡績則暗照歌舞  
則明

南越志

寒上有獸其名曰豹生角當心俯而磨之憤心  
而死炎州有鳥其名曰梟媪伏其子百日而長  
羽翼既成食母而飛蜀侯之迎秦牛牛逾近而

身轉危何異豹磨其角角愈利而身速亡乎白

公之據財財愈積而身愈滅何異梟之養子子

愈長而身就害也

劉書  
新編

因墀國獻五足獸狀如獅子玉錢千緡其形如  
環環重十兩上有天壽永吉之字問其使者五  
足獸是何變化對曰東方有解形之民使頭飛  
於南海左手飛於東山右手飛於西澤自臍已  
下兩足孤立至暮頭還肩上兩手遇疾風飄於  
海外落玄洲之上化爲五足獸則一指爲一足

也其人既失兩手使傍人割裏肉以爲兩肩宛  
然如舊也因墀國在西域之北送使者以鍬爲  
車輪十年方至晉及還輪皆絕銳莫知其遠近  
也拾遺記

翁韓國獻飛骸獸狀如鹿青色以寒青之絲爲  
繩繫之及死帝惜之而不瘞掛於苑門皮毛皆  
爛朽惟骨色猶青時人咸知其神異更以繩繫  
其足往視之惟見所繫處存而頭尾及骨皆飛  
去洞冥記

修彌國獻駿騾高十尺毛色赤斑皆有日月之  
象帝以金埏爲鑱絆以寶器盛芻以飼之上

吠勒國貢文犀四頭狀如水兕角表有光名明  
犀置暗中有光影亦曰影犀織以爲簾如錦綺  
之文述異記

炎州在南海中上有風生獸似豹青色大如狸  
網取之積薪數車燒之可燃鍬鎚鍛頭數十下  
乃死以口向風須臾便活以石上菖蒲塞鼻卽  
真死取其腦和菊花服之可壽五百歲

封徼山中有怒毛獸若不噴毛短三寸若墮毛長三尺

南康郡有君山高秀重叠有類臺榭名曰女媧宮有獸名格似猩猩之形自知吉凶人無機愛之則可馴狎欲執害之則去不來

並上

少皞出野遇一獸牛首而人身驚告皇娥娥曰

昔余聞之帝子牛首人身其名師親見之者百

福胥臻天將福汝汝何妄驚乎帝乃釋然

玄池子說

林

師尚父爲周司馬將師伐紂到孟津之上杖鉞

把旄號其衆曰倉兕倉兕者水中之獸也善覆

人船因神以化欲令急渡不急渡倉兕害汝

論衡

茲超入泰山遇一物如獐頭若婦人鬢髻簪珥

悉具歸語智瓊瓊曰此方輝也五百年一見見

者壽茲超果二百餘歲

集微

按孔子未嘗見狴狴至輒能名之太史公與張

良異世而目見其形使衆人聞此言則謂神而

先知然而孔子名狴狴聞昭人之歌太史公之

見張良觀宣室之畫也 論衡

漢黃霸爲封溪令部人陳廉攜酒并猩猩以獻

霸問曰何物人未及應囊中語曰斗酒并僕耳

獨異志

霸以其物有靈開囊視之猩猩悲啼而去

抱朴子

章帝章和元年安息國遣使獻獅子符拔符拔

形似鱗而無角 後漢書

武帝太康六年南陽獻兩足猛獸此毛虫之孽

也識者爲其文曰武形有虧金獸失儀聖主應

天斯異何爲言兆亂也 晉書

太康七年四角獸見于河間天戒若曰角兵象

也四者四方之謂當有兵亂起於四方後河間

王遂連四方之兵作爲亂階殆其應也 上

廣博物志卷之四十八

廣博物志卷之四十九

隴西董斯張纂

皖城何如寵訂

蟲魚一 龍 蛟 虵 魚

龍鱗蟲之長春分而登天秋分而入淵

說文

神龍能為高能為下能為大能為小能為幽能  
為明能為短能為長昭乎其高也淵乎其下也  
薄乎天光高乎其著也一有一亡忽微哉斐然  
成章虛無則精以和動作則靈以化於哉亡哉

國家圖書館, NATIONAL CENTRAL LIBRARY, TAIWAN, R.O.C.



君子辟神也觀彼威儀遊燕幽間有似鳳也

苑

有鱗曰蛟龍有翼曰應龍有角曰龍

巨彪切

龍無

角曰蛇龍

廣雅○一云有角  
蚪龍無角螭龍

蛟龍龍屬也明月之珠藏于蚌中蛟龍伏之

百歲之虬斷而復續千歲之木伐而有血

龍生九子蒲牢好鳴

鐘鈕之獸

囚牛好音

樂器之獸

蚩吻

好吞

殿脊之獸

嘲風好險

殿角之獸

睚眦好殺

刀頭之獸

負屭

好文

碑旁之獸

狴犴好訟

獄囚之獸

狻猊好坐

佛座之獸

霸下

好負重

碑座之獸

龍易骨蛇易皮麋鹿易角蟹易螯

造化權輿

龍珠在額蛟珠在皮蛇珠在口鼈珠在足魚珠

在眼蚌珠在腹

爾雅

龍頭上有一物如博山形名尺木龍無尺木不

能昇天

酉陽雜俎

角浪凹峭上壯下殺龍之雄也直臯圓巖薄鱗

壯尾龍之雌也

帝王始興將起河洛龍見皆察其首黑者人正

白者地正赤者天正

易乾鑿度

天子孝天龍負圖地龜出土天孽消滅景雲出  
游 孝經援神契

龍池之山四方高中央有池方七百里羣龍居  
之多五花樹羣龍食之 括地圖

武昌虬山有龍穴居人每見神虬飛翔出入歲  
旱禱之即雨後人築塘其下曰虬塘 搜神記

潯陽曇椿世居長沙宅有古井每夜輒聞有如  
爆竹聲相承謂之龍吒 異苑

真人常御九龍左驂名颺右服名歛 陶隱居真誥

渡知國有三池傳云大池有龍王次者龍婦小

者龍子 後漢書

黃帝錄圖五龍舞河 魏文帝禱占

舜使虞虎養一紫龍恒持燕炙示龍而不即與  
食龍俯而垂涎以器盛之滿一合而後與食以  
為常又取繪寶磨入紫龍涎色正赤以畫金石  
色透金玉中一寸繪寶仙艸也堯時生于朝堂  
之前四時有花成實 賈子說林

黃龍五采負圖而出舜前白玉檢黃金繩 古史

封泥兩端有文曰天王有玉璽五字博袤三寸  
運斗

河伯化爲白龍遊于水傍羿見射之河伯上訴  
天帝爲我殺羿天帝曰爾何故得見射河伯曰  
我時化爲白龍出遊天帝曰使汝深守神靈羿  
何從得犯汝今爲蟲獸爲人所射固其宜也羿  
何罪歟 楚辭注

夏德盛二龍降之禹使范氏御之以行 拓地圖

南潯之國有洞穴陰源其下通地脉中有毛龍

時說骨于曠澤之中魚龍同穴而處其國獻毛  
龍一雌一雄放置豢龍之宮至夏代養龍不絕  
因以命族至禹導川乘此龍及四海攸同反放  
河汭 拾遺記

周公旦卽攝七年鸞鳳見莫莢生青龍銜甲元  
龜背書 尚書中候

成王觀河洛沉璧青龍臨壇銜元甲之圖禮于  
洛亦如之元龜青純蒼光止于壇背甲刻書赤  
文成字周公援筆寫之 宋志

顏氏禱于尼丘升之谷艸木之葉皆上起降之谷艸木之葉皆下垂及懷妊十一月而生是夕有二龍繞室五老降庭五老者五星之精也顏氏之房聞鈞天之樂空中有聲云天感生聖子故降以和樂之音

祖庭廣記

鄭大水龍鬪于時門之外洧淵國人請爲榮焉子產弗許曰我鬪龍不我覲也龍鬪我獨何覲焉禳之則後其室也吾無求於龍龍亦無求於我乃止也

左傳

秋龍見于絳郊魏獻子問于蔡墨曰吾聞之蟲莫知于龍以其不生得也謂之知信乎對曰人實不知非龍實知古者畜龍故國有豢龍氏有御龍氏獻子曰是二氏者吾亦聞之而不知其故是何謂也對曰昔有颺叔安有裔子曰董父實甚好龍能求其嗜欲以飲食之龍多歸之乃擾畜龍以服事帝舜帝賜之姓曰董氏曰豢龍封諸豸川豸夷氏其後也故帝舜氏世有畜龍及有夏孔甲擾于有帝帝賜之乘龍河漢各二

履祥物志 卷之四 五 高陽生  
各有雌雄孔甲不能食而未獲豢龍氏有陶唐  
氏既衰其後有劉累學擾龍于豢龍氏以事孔  
甲能飲食之夏后嘉之賜氏曰御龍以更豕韋  
之後龍一雌死潛醢以食夏后夏后饗之既而  
使求之懼而遷于魯縣范氏其後也獻子曰今  
何故無之對曰夫物有其官官修其方朝夕思  
之一日失職則死及之失官不食官宿其業其  
物乃至若泯棄之物乃坻伏鬱湮不育故有五  
行之官是謂五官實列受氏姓封爲上公祀爲

貴神社稷五祀是尊是奉木正曰句芒火正曰  
祝融金正曰蓐收水正曰玄冥土正曰后土龍  
水物也水官棄矣故龍不生得不然周易有之  
在乾之垢曰潛龍勿用其同人曰見龍在田其  
大有曰飛龍在天其夬曰亢龍有悔其坤曰見  
羣龍无首吉坤之剝曰龍戰于野若不朝夕見  
誰能物之<sup>上</sup>

有大力毒龍以眼視人弱者卽死以氣噓人強  
者亦死時龍受一日戒出家入林樹間思惟坐

久疲懈而睡龍法眠時形狀如虵七寶雜色獵者見之驚喜言曰以此希有難得之皮獻上國王以爲船飾不亦宜乎便以杖案其頭刀剝其皮龍自念言我力能傾國土此一小物豈能困我今以持戒故不計此身當從佛語自忍閉目不視閉氣不喘憐愍此人爲持戒故一心受剝不生悔意旣以失皮赤肉在地時日大熱宛轉在地土中欲趣大水見諸小蟲來其身爲持戒故不復敢動自思惟言我此身以施諸蟲爲佛

道故今以肉施以充其身後以法施以益其身

命終卽生忉利天

智度論

周烈王六年林碧陽君之御人產二龍

搜神記

如有福龍依報快樂具足妻妾妓女衣服飲食象馬七珍無不備有優樂自在過逾于人乃至六欲天中亦有鳥獸自在受樂亦有薄福諸龍日別熱沙搏身爲諸小蟲之所啖食又如人間畜生驅策鞭打擔輕負重馳騁走使不得自在

法苑珠林

方丈山有龍皮骨如山阜散百頃遇其蛻骨之時如生龍或云龍鬪此處膏血如水流膏色黑者著草木及諸物如淳漆也膏色紫先著地凝堅可爲寶器燕昭王二年海人乘霞舟以雕壺盛數斗膏以獻昭王王坐通雲之臺亦曰通霞臺以龍膏爲燈光耀百里烟色丹紫國人望之咸言瑞光世人遙拜之燈以火浣布爲纏拾遺記燕太子丹質于秦秦遇之無禮乃求歸秦王爲機發之橋欲以陷丹丹過之橋不爲發又一說

交龍捧輦而機不發但言今不知其故處矣水經

小傳稱秦始皇帝欲填東海龍女來惑之與始皇交而有娠後奔入海棄其子于岸楚將項燕因獵得之及長身長八尺力能扛鼎卽項籍也

陶安公者六安鑄冶師也數行火火一旦散上行紫色衝天安公伏冶下求哀須臾朱雀止冶上曰安公安公治與天通七月七日迎汝以赤龍至期赤龍到安公騎之上升列仙傳

陵陽子明者銍鄉人也好釣魚于旋溪釣得白

龍子明懼解釣拜而放之後得白魚腹中有書  
教子明服食之法子明遂上黃山采五石脂沸  
水而服之三年龍來迎去止陵陽山上百餘年  
山去地千餘丈大呼下人令上山半告言谿中  
子安當來問子明釣車在否後二十餘年子安  
死人取墓石山下有黃鶴來棲其塚邊樹上鳴  
呼子安云

邗子者蜀人好放犬犬走入山穴邗子隨之行  
數百里出山頭有殿屋官府仙人吏使甚嚴見  
其故妻主洗魚與邗子一函藥發函魚子也著  
池中養之一年皆爲龍邗子後還山見犬色更  
赤有長翰隨邗子遂留山上時時下護其宗族  
蜀人立祠焉

騎龍鳴者渾亭人也年二十于池中求得龍子  
狀如守宮者十餘頭養食結艸廬而守之龍長  
大稍稍而去後五十餘年水壞其廬而去一旦  
騎龍來渾亭下語云馮伯昌孫也此間人不去  
五百里必當死信者皆去不信者以爲妖至八



月果水至死者萬計

呼子先者漢中卜師也壽百餘年臨去呼酒家老嫗曰急裝當與汝俱夜有仙人持二茅狗來呼子先子先持一與嫗乃龍也騎之上華陰山後嘗于山上大呼言子先酒母在此

上

韓雉見申羊于魯有龍浴于沂韓雉曰吾聞之出見虎搏之見龍射之今弗射是不行吾聞也遂射之

尸子

漢惠帝二年正月癸酉旦有兩龍見于蘭陵廷

東里溫陵井中至乙亥夜去京房易傳曰有德遭害厥妖龍見井中又曰行刑暴惡黑龍從井出

搜神記

漢廷尉扶嘉胸臆人也初嘉母于湯溪水側遇龍後生嘉長占吉凶巧發奇中高祖爲漢王時與嘉相遇嘉勸定三秦高祖以嘉志在扶翼賜姓扶氏爲廷尉食邑胸臆嘉臨終有言曰三牛對馬嶺不出貴人出鹽井

西京雜記

西域獻火龍高七尺映日看之光如聚炬火

述異

董仲舒夢蛟龍入懷乃作繁露

漢元和元年大雨有一青龍墮于宮中帝命烹

之賜羣臣龍羹各一杯故李尤七命曰味兼龍

羹並上

後漢建武中曹鳳字仲理為北地太守政化尤

異黃龍見于九里谷高岡亭天子嘉之加秩中

二千石水經注

魏明帝青龍元年正月甲甲青龍見邠之摩陂

井帝親與羣臣共觀之既而詔畫工圖寫龍潛

而不見宋書

湯陰西有真人社舊傳孫登寓此值旱眾禱于

龍得雨將祭謝之登曰此病龍雨安能蘇禾稼

弗信請嗅之水果腥穢龍時背生疽聞登言化

老翁求治曰病痊當有報不數日果大雨石上

忽裂一井其水湛然蓋龍穿此以報也山川紀異

永昌郡古哀牢國哀牢山名也其先有一婦人

名曰沙壺後漢作沙壺依哀牢山下居以捕魚自給

忽于水中觸一沈木遂感而有娠度十月產子男十人後沈木化爲龍出謂沙壺曰君爲我生子今在乎而九子驚走唯一小子不能去陪龍坐龍就而舐之沙壺與言語以龍與陪坐因名曰元隆猶漢言陪坐也沙壺將元隆居龍山下元隆長大才武後九兄曰元隆能與龍言而黠有智天所貴也共推以爲王

華陽國志

秦使者甘宗所奏西域事云外國方士能神呪者臨川禹步吹氣龍卽浮出初出乃長數十丈方士吹之一吹則龍輒一縮至長數寸乃取置壺中以少水養之外國常苦旱災于是方士聞而早處便齋龍往出賣之一龍直金數十斤舉國會歛以顧之直畢乃發壺出龍置淵中復禹步吹之長數十丈須臾雨四集矣

抱朴子

張永家地有泉出小龍在焉從此遂爲富室踰年因雨騰躍而去于是生貨日不暇給

異苑

晉懷帝永嘉中有韓媪者于野中見臣卵持歸育之得嬰兒字曰擗兒方四歲劉淵築平陽城

不就募能城者擲兒應募因變爲蛇令媪遺灰誌其後謂媪曰憑灰築城城可立就竟如所言淵怪之遂投入山穴間露尾數寸使者斬之忽有泉出穴中滙爲池因名金龍池

搜神記

大康五年正月二龍見武庫井中武庫者帝王威御之器所寶藏也屋宇邃密非龍所處是後七年藩王相害二十八年果有二胡僭竊神器皆字曰龍

上

晉愍帝建興二年十一月抱罕羌妓產一龍子

色似錦文嘗就母乳遙見神光少得就視

宋書

陶侃嘗捕魚雷澤得一織梭還挂着壁有頃雷雨梭變成赤龍從屋而下

異苑

桓玄于南州起齋悉畫盤龍于其上號爲盤龍齋劉毅小字盤龍至是遂居之

晉書

劉安河中人也通鬼道未來之事皆預知之河間有一趙廣家槽上馬忽變作人面全家大驚往問劉安曰此大惡也君急歸家去宅三里披髮大叫即可免之廣乃依言披髮大叫廣家中

大小一時走出驚怕看之堂內無人堂屋一時崩倒全家得免不損一人乃贈財賄與安重問此災何有安曰堂屋西壁下深三尺當有三個石柱今已災過慎勿發看若視之必大貧若不看必大富貴此神龍也後廣不依卽掘看之驗其虛實果有一物赤色大如屋柱飛出他去後廣大貧一如其言也

搜神記

東海徐美之字宗文嘗行經山中見黑龍長丈餘頭有角前兩足皆具無後足曳尾而行後文

帝立美之竟以凶終

異苑

晉義熙中江陵趙姥以酤酒爲業居室內地忽自隆起姥察爲異朝夕以酒酹之嘗有一物出頭似驢而地初無孔穴及姥死隣人聞土下有聲如哭後人掘地得一異物蠢蠢而動不測大小須臾失之俗謂之土龍

吳猛還豫章附載客船一宿行千里同行客視船下有兩龍載之船不着水

沙門釋慧遠棲神廬嶽常有游龍翔其前遠公

有奴以石擲中乃騰躍上升有頃風雲颯燁公知是龍之所興登山燒香會僧齊聲唱偈于是霹靂迴向投龍之石雲雨乃除

並上

慕容熙建始元年三月太史丞梁延年夢月化為五白龍夢中占之曰月臣也龍君也月化為龍當有臣為君者是寤而告人曰國符其將盡乎是秋熙為高雲所滅

十六國春秋

楊羲以四月九日夜夢北行登高山上大有宮室四面皆有大水見一白龍東向飛行有白衣

好女子于龍口中三入三出又有一老翁着繡衣裳芙蓉冠拄赤九節杖而立問公何等女子入龍口邪對曰此太素玉女蕭子夫取龍炁以鍊形也問翁何人曰我蓬萊仙公洛廣休住此蓬萊山又問此龍可乘否曰以待真人張誘世石慶安許王斧丁瑋寧此侍宸帝官龍也須臾間公呼此四賢至命人賦一詩各下山別初下山許主簿來公語主簿使飲太平家酒又戒之曰守一慎勿失後當用汝輔翼及到十日夜

義具此夢上白諸真惟紫微夫人見答衆真並笑清靈曰以冥通冥也心感洞照南嶽君之力也

陶隱居真誥

許長史今所營屋宅對東面有小山名雷平山周時有雷氏養龍來在此山

真誥

竺道生止青園寺中其年夏雷震青園佛殿龍昇于天光影西壁因改寺名曰龍光時人歎曰龍旣去生欲行矣俄而投迹廬山肖影巖岫

梁釋法聰與晉安王臨白馬泉內有白龜就聰手中取食謂王曰此是雄龍又臨靈泉有五色鯽魚亦就手食聰曰此是雌龍王與羣臣重賞而回

法苑

後魏宋雲使西域至積雪山中有池毒龍居之昔五百商人止宿池側值龍忿怒沉殺商人果陀王聞之捨位與子向烏場國學婆羅門呪四十年之中善得其術還復王位就池呪龍龍化爲人悔過向王王卽從之

洛陽伽藍記

釋智瓌聞智者軌行超羣爲世良導卽泛舸豐

流直指台岫伏膺受道乃遣行法華懺悔第二  
七月初夜懺訖還就禪床如欲安坐仍見九頭  
龍從地湧出上昇虛空明且諮白璪曰此是表  
九導衆生聞法華經將來之世破無明地入法  
性空爾

神僧傳

智顛母徐氏夢香煙五綵縈迴在懷欲拂去之  
聞人語曰宿世因緣寄托僧道福德自至何以  
去之又夢吞白鼠如是再三怪而卜之師曰白  
龍之兆也及誕育之夜室內洞明信宿之間其  
光乃止忽有二僧扣門曰善哉兒德所重必出  
家矣言訖而隱年十八投湘州果願寺沙門法  
緒而出家焉

上

法顯至迦施國國有白耳龍每與衆僧約令國  
內豐熟皆有信効沙門爲起龍舍并設福食每  
至夏坐訖龍輒化作一小蛇兩耳悉具衆皆咸  
識是龍以銅盂盛酪置龍子中從上座至下行  
之徧乃化去年輒一出顯亦親見

法苑珠林

周靖帝大象元年夏滎陽汴水北有龍鬪初見



白光直屬天自東方而來有白龍長十許丈西北向舐掌而鳴西北有黑龍亦乘雲而至風雷相擊乍合乍離暴雨大注自午至申白龍升天黑龍墜地復有大鯉魚三從小魚無數乘空而鬪雷雨又甚大風發屋至暝乃止魚不復見明日有兩黑蛇大者長丈五小者半之竝傷腰頸死于竇前大蛇者周天元帝及靖帝之象大魚三而鬪者尉遲迴王謙司馬消難三方起兵亂之異

五行記

佛留影石室在那乾呵羅國毒龍池側佛坐龍石室窟中爲龍作十八變踊身入石猶如明鏡在于石內映現于外遠望則見近望不見諸天百千供養佛佛影亦說法

現佛三昧經

迦維羅越國有優婆塞姓釋可二十餘家是白靜王之苗裔昔太子生時有二龍王一吐冷水一吐煖水今有池尚一冷一煖

支僧載外國事

昔有一金翅鳥王其身極大兩翅相去六千餘里常入海中取龍食之諸龍常法畏金翅鳥常

求袈裟着宮門上鳥見袈裟生恭敬心便不復前行食彼諸龍鳥食龍時以翅搏海水擗龍現而取食之時有一龍爲鳥所逐卽取袈裟戴着頂上尋岬而走時金翅鳥化作婆羅門追逐龍后種種罵言汝今何不放此袈裟龍畏死故急捉不捨爾時海邊有一仙人龍時恐怖投趣仙人鳥見仙人不敢復前仙人卽出爲鳥說法教鳥向龍共相懺悔已各去佛告比丘昔仙人者今我身是金翅鳥者瓶沙王是爾時龍者達尼

迦是昔蒙袈裟得免鳥食今復蒙我袈裟因緣得脫王難出家修道獲阿羅漢是故當知袈裟威力不可思議又海龍王經云爾時有龍王而白世尊曰於此海中無數種龍有四種金翅鳥常食斯龍及龍妻子願佛擁護常得安隱於是世尊脫身皂衣告海龍王汝取是衣分與諸龍皆令周徧有值一縷者金翅鳥王不能犯觸持禁戒者所願必得爾時諸龍各懷驚悸各心念言是佛皂衣甚爲小少安得周徧大海諸龍時

佛卽知龍心所疑告龍王言假使三千大千世界所有人民各分如來皂衣終不減盡譬如虛空隨其所欲則自然生時龍卽取佛衣而分作無央數百千萬段各各分與隨其所乏廣狹大小自然給與其衣如故終不知盡當敬此衣如敬世尊如敬佛塔寺言觀如來衣者卽脫龍身于是賢劫中皆得無着當般泥洹爾時四金翅鳥王各與千眷屬俱白佛言今日我等自歸三寶悔過前犯奉持禁戒從今日始常以無畏施

一切龍擁護正法至于滅盡不違佛教

法苑珠林

佛言閻浮提中及四天下有金翅鳥名伽樓羅王于諸鳥中快得自在此鳥業報應食諸龍于閻浮提日食一龍王及五百小龍第二日于弗婆提第三日于瞿耶尼第四日于鬱單越各食如前周而復始經八千歲此鳥爾時死相已現諸龍吐毒無由得食彼鳥饑逼周樟求食了不能得遊巡諸山永不得安至金剛山然後暫住從金剛山直下至大水際從大水際至風輪際

爲風所吹還至金剛山如是七返然後命終其命終已以其毒故令十寶山同時火起爾時難陀龍王懼燒此山卽大降雨澍如車軸鳥肉散盡唯有心在其心真下如前七返然後還住金剛山頂難陀龍王取此鳥心以爲明珠轉輪王得爲如意珠

昔佛住舍衛城南有大林邑商人驅八牛到北方俱哆國復有商人共在澤中放牛時離車地邊捕得一龍六穿鼻牽行商人見之卽起慈心

問離車言汝牽此欲作何事荅言我欲殺噉商人言勿殺我與汝一牛貿取放之捕者不肯乃至八牛方言今爲汝故我當放之卽取八牛放去龍女時商人復念此是惡人恐復追逐更還捕取卽自隨看所向到一池邊龍女變爲人身語商人言天施我命今欲報恩可共入我宮當報大恩商人荅言汝等龍性卒暴瞋恚無常或能殺我荅言前人繫我汝能力救彼以受布薩法華言淨住戒法也故都無殺心何況天今施我壽而

當加害小住此中我先入

昇政

擋

丁浪

是龍

門邊見二龍繫在一處問言汝爲何事荅言此龍女半月月中三日受齋法我兄弟守護此龍女不堅固爲離車所得以是故被繫唯願天慈語令放我此龍女若問欲食何等食者當索閻浮提人間食龍女摒擋已便卽呼入坐寶床褥上龍女白言今欲食何等食荅言欲須閻浮提人間食卽下種種食問龍女言此人何故被繫龍女言此有過我欲殺之商人言汝莫殺荅言要

當殺之商人言汝放彼者我當食耳白言不得直爾放之當罰六月擯置人間商人問言汝有如是莊嚴用受布薩法荅言我龍法有五事若何等五生時龍眠時龍姪時龍瞋時龍一日之中三過皮肉落地熱沙搏身復問汝欲求何等荅言出家難得又問當就誰出家荅言如來正供應正遍知今在舍衛城未脫有脫汝可就出家商人便言我欲還歸龍女卽與八餅金言此是龍金是汝父母眷屬終身用不盡言語汝合

眼卽以神變持着本國行伴先至語其家言入龍宮去父母謂見已死眷屬宗親聚在一處悲號啼哭時放牧者及取薪艸人見已先還語其家言某甲來歸家人聞已卽大懽喜出迎入家已爲作生會作生會時以八餅金持與父母此是龍金截已更生盡壽用之不可盡也

古龜茲國王阿主兒者有神異力能降伏毒龍時有賈人買市人金銀寶貨至夜中錢金化爲炭境內數百家皆失金寶王有男先出家成阿

羅漢果王問之羅漢曰此龍所爲龍居北山其頭若虎今在某處眠耳王乃易衣持劍默出至龍所見龍臥將欲斬之因曰吾斬寐龍誰知吾有神力遂叱龍龍驚起化爲獅子王卽乘其上龍怒作雷聲騰空至城北二十里王謂龍曰爾不降當斷爾頭龍懼王神力乃作神語曰勿殺我我當與王乘欲有所向隨心卽至王許之後常乘龍而行

昔有尊者阿羅漢字祇夜多佛時去世七百年

後出罽賓國時罽賓國有一惡龍名阿利那數作災害時有二千羅漢各盡神力驅遣此龍令出國界其中有百羅漢以神通動地又有五百人放大光明復有五百人入禪定經行諸人各盡其神力不能使動時尊者祇夜多最後往到龍池所三彈指言龍汝今出去不得住此龍卽出去不敢停住爾時二千羅漢語尊者言我與尊者俱得漏盡解脫法身悉皆平等而我等各各盡其神力不能令動尊者云何以三彈指令

龍遠入大海也于時尊者答言我凡夫已來受持禁戒至突吉羅等心護持如四重無異今諸人者所以不能動此龍者神力不同故不能同也

爾時龍王卽以四龍聰明智慧者作僧護弟子龍王言白尊者爲我教此四龍各一阿含第一龍者教增一阿含第二龍者教中阿含第三龍者教禰阿含第四龍者教長阿含僧護答曰可爾僧護卽教第一龍者默然聽受第二龍者眠

目口誦第三龍者迴顧聽受第四龍者遠住聽受此四龍子聰明智慧于六月中誦四阿含領在心懷盡無遺餘時大龍王詣僧護所拜跪問訊不愁悶耶僧護答曰甚大愁悶龍王問曰何故愁悶僧護答曰受持法者要須軌則此諸龍等在畜生道無軌則心不如佛法受持誦習龍王白言大德不言呵諸龍等所以者何以護師命故作此聽有四毒不得如法受持讀誦何以故初默受者以聲毒故不得如法若出聲者必

害師命是故默然而受第二閉目受者以見毒故不得如法若見師者必害師命是故閉目而受第三迴顧受者以氣毒故不得如法若氣噓師必害師命是以迴顧而受第四遠住受者以觸毒故不得如法若身觸師必害師命是以遠住而受

上○以下蛟

畢山帝苑之水出焉其中多蛟

山海經

禱過之山浪水出焉而南流注于海其中有虎蛟其狀魚身而蛇尾其音如鴛鴦食者不腫可



以已痔」

北海之外有滄海之水渤澥高隱于日中有巨魚大蛟莫測其形也吐氣則八極皆暗振鬣則五嶽波盪當唐堯時懷山爲害大蛟縈天三河俱溢海瀆同流三河者天河地河中河是也此三水有時通壅至聖之治水色俱溢無有流沫及帝之商均暴亂天下則巨魚吸日蛟繞于天

拾遺記

夏桀宮中有女子化爲龍不可近俄而復爲婦

人甚麗而食人桀命爲蛟妾告桀吉凶

述異記

帝以季秋之月泛蘅蘭雲鷁之舟窮晷係夜釣于桂臺下以香金爲鈎繡絲爲綸丹鯉爲餌釣得白蛟長三丈若大虵無鱗甲帝曰非祥也命大官爲鮓肉紫骨青味甚香美

拾遺記

李冰爲蜀郡守有蛟歲暴漂墊相望冰乃入水戮蛟已爲牛形江神龍躍冰不勝及出率勇者數百持強弓大箭約曰吾前者爲牛今江神必亦爲牛矣我以太白練自束以辨汝當殺其無

記者遂吼呼而入須臾雷風大起天地一色稍定有二牛鬪于上公練甚長白武士乃齊射其神遂斃從此蜀人不復爲水所病至今大浪衝濤欲及公之祠皆瀾瀾而去故春冬設有鬪牛之戲未必不由此也

成都志

帝好微行于長安城西夜見一螭遊于路董謁曰昔桀媚妹喜于膝上以金簪貫玉螭腹爲戲今螭腹餘金簪穿痕得此非耶

洞冥記

武帝元封五年冬巡狩至于盛唐望祀虞帝于

九疑登驚天柱山自潯陽浮江親射蛟江中獲之舳艫千里薄樅陽而出乃作盛唐樅陽歌

琴操

後漢時姑蘇有男子衣白衣冠幘容貌甚偉身長七尺眉目疎朗從者六七人遍歷人家姦通婦女欲掩捕卽有風雨雖守郡有兵亦不敢制月餘術人趙杲在趙聞吳患泛舟遽來杲適下舟步至姑蘇北堤上時會守送臺使遇亦避之于館杲因謁焉守素知杲有術甚喜杲謂郡守曰君不欲見乎因請水燒香長嘯數聲天風歛

至聞空中數十人響應杲擲手中符符去如風頃刻見此妖如有人持至者甚惶懼杲謂曰何敢幻惑不畏乃按劍曰誅之便有旋風擁出杲謂守曰可視之矣使未出門已報去此百步有大白蛟長三丈斷首于路傍

三吳記

永陽李增行經大溪見二蛟在水引弓射之中一卽死增歸因復出市有女子素服御涕提所射箭增怪而問焉女答曰何用問爲若是君許便以相還授矢而滅增惡而驟反未達家暴死

于路

異苑

曹公幼而智勇年十歲常浴于譙水有蛟來逼自水奮擊蛟乃潛退于是畢浴而還弗之言也後有人見大虵奔逐操笑之曰吾爲蛟所擊而未懼斯畏虵而恐耶衆問乃知咸警異焉

長沙有人忘姓名家江邊有女下渚澣衣覺身中有異後不以爲患遂妊身生三物皆如蝦魚女以已所生甚憐之著澡盤水中養經三月此物遂大乃是蛟子皆有字大者爲當洪次者名

破阻小者曰撲岬天暴雨三蛟一時俱去遂失  
所在後天欲雨此物輒來女亦知其當來便出  
望之蛟子亦舉頭望母良久復去經年此女亡  
後三蛟一時俱至墓所哭泣經日乃去聞其哭  
聲如狗嗥

續搜神記

後漢定襄太守竇奉妻生子武并生一蛇奉送  
蛇于野中及武長大有海內俊名母死將塋未  
窆賓客聚集有大蛇從林艸中出徑來棺下委  
地俯仰以頭擊棺血涕並流狀若哀慟有頃而

去時人知爲竇氏之祥

搜神記

元帝永昌中暨陽人任谷因耕息于樹下忽有  
一人着羽衣就淫之旣而不知所在谷遂有妊  
積月將產羽衣人復來以刀穿其陰下出一蛇  
子便去谷遂成宦者詣闕自陳留于宮中

安城平都縣尹氏居在郡東十里日黃村尹佃  
舍在焉元嘉二十三年六月中尹兒年十三守  
舍見一人年可二十許騎白馬張纒及從者四  
人衣皆黃色從東方而來至門呼尹兒來暫寄

息因入舍中庭下坐床一人捉繖覆之尹兒看其衣悉無縫馬五色斑似鱗甲而無毛有頃雨氣至此人上馬去迴顧尹兒曰明日當更來兒觀其去西行躡虛而漸升須臾雲氣四合白晝爲之晦冥明日大水暴出山谷沸涌丘壑森漫將淹尹舍忽見大蛟三丈餘盤屈庇其舍焉上並吳大帝赤烏三年七月有王述者採藥于天台山時熱息于石橋下臨溪飲忽見溪中有一小青衣長尺餘乘赤鯉魚徑入雲中漸漸不見述

良久登峻巖四望見海上雲起頃刻雷電交鳴俄然將至述懼伏于虛樹中見牽一物如布而色如漆不知所適及天霽又見所乘之赤鯉小童還入溪中乃黑蛟耳三吳記。以下蛇

蛇無足而行魚無耳而聽蟬無口而鳴有然之者也淮南子。又抱朴子云鼈無耳而善聽。蚓無口而揚聲。

山中見大蛇冠幘者名曰升卿呼其名則吉泰華之上削成而四方有蛇名曰肥遺六足四

翼見則天下大旱山海經。又云渾夕之山有蛇一首兩身名曰肥遺。

大成之山有蛇名曰長蛇其毛如旒豪其音如鼓柝

神困之山其下有白蛇

跋踵之山有大蛇

鮮山多鳴蛇其狀如蛇而四翼音如磬見則其邑大旱

伊山多花蛇其狀如人面而豺身鳥翼而蛇行其音如叱呼見則其邑大水

幽都之山浴水出焉是有大蛇赤首白身其音

如牛見則其邑大旱 並上

寄居之蟲委甲步內二首之蛇弦之為弓 抱朴子○

按起王琴弦化為  
柝首意即此耶

共工之臣號曰相柳稟此奇表蛇身九首恃力

桀暴終禽夏后 山海經圖讚

越人得髯蛇以為上肴中國得而棄之無用 淮南子

黑蜃在身當以持戒鉤除之又云睡蛇既去乃

可安眠黑蜃亦睡蛇也 遺教經

昔負丘多大蛇又生好藥黃帝將登焉廣成子教之佩雄黃而蛇皆去也

抱朴子

天子遺其靈鼓乃化爲黃蛇

穆天子傳

孔子夢三槐間豐沛市有赤虺起呼顏淵子夏往觀之見赤蛇化爲黃金上有文曰卯金刀後

高祖起豐沛

金樓子

晉獻公之太子至靈臺蛇繞左輪御曰太子下拜吾聞國君之子蛇繞左輪者速得國太子遂不行返乎舍御人見太子拔劍將死御止之太

子曰不然我得國君之孽也拜君之孽不可謂禮見機祥而忘君之安國之賊也懷賊心以事君不可謂孝挾僞意以御天下懷賊心以事君邪之大者也而使我行之是欲國之危明也遂伏劍而死

新序

晉文公出大蛇當道如拱文公反修德使吏守蛇吏夢天殺蛇曰何故當聖君道覺而視蛇已死矣

魯定公元年有九蛇繞柱占以爲九世廟不祀

乃立煬宮

搜神記

楚大夫靳尚以讒殺屈原爲天所遣作一大蟒穴在山後人爲立廟

攝山記

邛都縣下有一老姥家貧孤獨每食輒有小虵頭上戴角在牀間姥憐而飴之食後稍長大遂長丈餘令有駿馬虵遂吸殺之令因大忿恨責姥出虵姥云在牀下令卽掘地愈深愈大而無所見令又遷怒殺姥虵乃感人以靈言曠令何殺我毋當爲毋報讐此後每夜輒聞若雷若風

四十餘日百姓相見咸驚語汝頭那忽戴魚是夜方四十里與城一時俱陷爲湖土人謂之爲陷湖唯姥宅無恙迄今猶存漁人採捕必依止宿每有風浪輒居宅側恬靜無他風靜水清猶見城郭樓櫓斐然今水淺時彼土人沒水取得舊木堅貞光黑如漆今好事人以爲枕相贈

搜神記

沛公起兵野戰喪皇妣于黃鄉天下平定乃使使者以梓宮招魂幽野于是丹虵在水自灑躍



入于梓宮

陳留風俗傳

漢武帝大始四年七月趙有虵從郭外入與邑中虵鬪孝文廟下邑中虵死後二年秋有衛太子事自趙人江充起

搜神記

漢武帝時張寬爲揚州刺史先是有二老翁爭山地詣州訟疆界連年不決寬視事復來寬窺二翁形狀非人令卒持杖戟將入問汝等何精翁走寬呵格之化爲二虵

上

巴郡馮緄爲議郎發綬笥有二赤虵可三尺分南北走大用憂怖卜云此吉祥也君後當爲邊將以東爲名後五年果爲大將軍拜遼東太守

風俗通

漢桓帝卽位有大虵見德陽殿上洛陽市令淳于翼曰虵有鱗甲兵之象也見于省中將有椒房大臣受甲兵之象也乃棄官遁去至延熹二年誅大將軍梁冀捕治家屬揚兵京師也

搜神記

閻成子少好長生學道四十餘年後入荆山中積七十餘歲爲荆山山神所試成子謂是真人

拜而求道而爲大虵所噬殆至于死

真誥

馬援征五溪蠻進營壺頭中暑病乃穿岸爲室以避炎氣令武陵語曰壺頭山邊有石窟卽馬援所穿室也室內有虵如百斛船大云是援之餘靈也

武陵記

管輅鄉里問君往者爲王府君論怪云老書佐爲虵老鈴下爲烏此本皆人何化之微賤乎輅云萬物之化無有常形人之變異無有常體是以魃爲黃能如意爲蒼狗斯亦至尊之位而爲

黔喙之類也况虵者務辰巳之位烏者棲太陽之精斯乃騰黑之明象白日之餘景如書佐鈴下各以微軀化爲虵烏不亦可乎

管輅別傳

孫氏懷張承時乘輕舸于江浦忽見白虵長三丈騰入舟中咒曰若爲吉祥勿毒噬我縈而將還置于房中一宿不復見母嗟惜之隣中相謂曰昨者張家有白鵠聳翮入雲以告承母母使筮之筮者曰吉祥鵠是延年之物從室入雲自甲升高之象昔吳闔閭葬其妹殉以美人寶劍

珍物窮江南之富未及千年雕雲覆其溪谷美女遊于塚上白鵠翔于林中白虎嘯于山側皆昔時之精靈今出于世當使子孫位極人臣擅名江表若生子可名爲白鵠後承生昭位輔吳將軍年九十蛇鵠之祥也

拾遺記

東晉時跋陀羅尊者譯經于廣陵天寧寺之青蓮池忽有兩青蛇從井中出化二童子白首爲尊者灑掃焚香訖暮俟其收經卷而去日復如是譯經既畢青衣亦不知所在

寶祐廣陵志

吳末臨海人入山射獵爲舍住夜中有一人長一丈着黃衣白帶來謂射人曰我有讐尅明當戰君可助當有相報射人曰自可助君耳何用報爲答曰明日食時君可出溪邊敵從北來我南住應白帶者我黃帶者彼射人許之明出果聞岍北有聲狀如風雨草木四靡視南亦爾唯見二大蛇長十餘丈于溪中相遇便相盤繞白映勢弱射人因引弩射之黃映者卽死因將暮復見昨人來辭謝云住此一年獵所獲甚多家

至巨富數年後憶先山多肉忘前言復更往獵復見先白帶人語之言我語君勿復來君不能見用讐子已大今必報君非我所知射人聞之甚怖便欲走乃見三烏衣人皆長八尺俱張口向之射人即死

搜神記

丹陽鍾忠以元嘉冬月晨行見有一蛇長二尺許紋色似青琉璃頭有雙角白如玉感而畜之于是貲業日登經年蛇自亡去忠及二子相繼殞斃此蛇來吉去凶其惟龍乎

異苑

晉太康中陳留阮士瑀傷于虺不忍其痛數嗅其瘡已而雙虺成于臯中元康中曆陽紀元載客食道龜已而成痕醫以藥攻之下龜子數升大如小錢頭足殼備文甲皆懼惟中藥已死

搜神記

賈謐家數有妖異飄風吹其朝服飛上數百丈墜于中丞臺又虺出其被中暴雷震其室柱陷入地壓毀牀帳

晉書

晉太元中汝南人入山伐竹見一竹中虺形已

成枝葉如故又吳郡桐廬人常伐餘遺竹見一竹竿雉頭頸盡就身猶未變此亦竹爲蛇蛇爲雉也異苑

吳興太守袁玄瑛當之官筮卦吉凶曰法至官當主赤虵爲妖不可殺至果有赤虵在銅虎符石函上蟠玄瑛摘殺之其後果爲賊徐馥所害

郭璞洞林

揚州別駕顧球姊生十年便病至年五十餘令郭璞筮之得大過之升其辭曰大過卦者義不

嘉塚墓枯楊無英華振動遊魂見龍車身被重累嬰天邪法由斬祀殺靈虵非已之咎先人瑕案卦論之可奈何球乃訪迹其家事先世曾伐大樹得大虵殺之女便病病後有羣鳥數千迴翔屋上人皆怪之不知何故有縣農行過舍邊仰視見龍牽車五色晃爛甚大非常有在遂滅

搜神記

扈謙居金陵攝山每筮一卦百錢日限錢五百以三百供母二百飲酒五百足一卦千錢不爲

也海西公旦出見赤虵蟠御牀詔謙筮之謙曰  
陛下有出官之象海西曰可消伏否曰後年有  
大將北征失利此災可消後桓溫北征敗績還  
乃廢海西立簡文

晉明帝大寧初武昌有大虵常居故神祠空樹  
中每出頭從人受食京房易傳曰虵見于邑不  
出三年有大兵國有大憂尋有王敦之逆

有士人陳甲本下邳人元帝時寓居華亭獵于  
東野大藪中歛見大虵長六七丈形如百斛船

玄黃五色卧岡下土人卽射殺之不敢說三年  
後與鄉人共獵至故見虵處語同行云昔在此  
殺大虵其夜夢見一人烏衣黑幘來至其家言  
曰我昔昏醉汝無狀殺我吾昔醉不識汝面故  
三年不相知今日來就死其人卽驚覺明日腹

痛而卒

並上

蜀主李勢宮人張氏有妖容勢寵之一旦化爲  
大斑虵長丈餘送苑中夜復來寢牀下勢懼遂  
殺之復有鄭美人勢亦寵愛化爲雄虎一夕食

勢寵姬未幾勢爲桓溫所滅

獨異記

大尉郗鑒字道徽鎮丹徒曾出獵時二月中蕨始生有一甲士折食一莖卽覺心中淡淡欲吐因歸乃成心腹疼痛經半年許忽大吐吐出一赤虵長尺餘尚活動搖乃挂着屋簷前汁稍稍出虵漸焦小經一宿視之乃是莖蕨猶昔之所食病遂除瘥

搜神記

顏含次嫂繁氏老而失明含省嫂病困須得蚘虵膽爲藥而求不能得于晝獨坐有一童子持

一青章授含開視虵膽也童子逡巡出戶化成

青鴻飛去得膽藥成嫂病卽愈

晉中興書

高祖永初中張春爲武昌太守時人有嫁女未及升車者女忽然失怪出外毆擊人乃自云已不樂嫁俗人巫云是邪魅將女至江際遂擊鼓以術咒療春以爲欺惑百姓刻期須得妖魅翌日有一青虵來到坐所卽以大釘釘其頭至日中時復見大龜從江來伏于巫前巫以朱書龜背作巫更遣入江至暮有大白鼉從江中出乍